

Hebreos

Bëngbe Bëtsá bëngaftaca tojoyebuambá, chabe Uaquiñáftaca

¹ Tempo, Bëngbe Bëtsá ba soye y ba soyëngaca bëngbe bëts taitángbioye tojanéyana, chë chabe juabna oyebuambnayëngaftaca.

² Pero quem tempo bëngaftaca tojoyebuambá, chabe Uaquiñá jíchmuase, bëngbioye cha chašúyanama. Bëngbe Bëtsá tojama, lempe ntšamo chabe soye yomncá, chabe Uaquiñabiama chaotsemnama, y chábeyeca Bëngbe Bëtsá quem luare y nÿetsca inÿe luarënga tojama.

³ Cha endinÿanÿná Bëngbe Bëtsabe corente buashinÿinÿanana y uámanana, y cha endmëna cach Bëngbe Bëtsacá, y chábeñe bënga mondobena jinÿama ntšamo Bëngbe Bëtsá yomncá. Chabe bëts obenánaca endútabna lempe ntšamo quem luarentše yobinÿncá; cha tojayana y chca jtsemnana. Cha tojanóbana bëngbe bacna soyënga jabuajuánama, y chentsana Bëngbe Bëtsá tojaninÿanÿé cha puerte bëtsá y uamaná bëtsemnama, celoca játbemëse, Bëngbe Bëtsabe catšbioica, nÿetscanga jtsamëndayama.

Bëngbe Bëtsabe Uaquiñá chë angelëngbiana más bëtsá yomna

⁴ Y chca, Bëngbe Bëtsá tbojánbema chë angelëngbiana más uamaná y obená, er Bëngbe Bëtsá tbojanbuajó canÿe más uámana uabaina y chë

angelëngbiama canye más uámana trabajo tbojanbonýé.

⁵ Ndegombre chca endmëna, er Bëngbe Bëtsá ndocna te ndocna ángelbioye mëntsá tbonjaniyana, ntšamo chabe Uaquiñábioye tbojaniyancá:

Aca atšbe Uaquiñá condmëna.

Mënté entsanga sënjinýanyé aca atšbe Uaquiñá comnama ca.

Ni ndocna angelbiama mëntsá tojánayana, ntšamo chabe Uaquiñabiama tojanayancá:

Atše canye taitá chabiama chántsemna,

y cha canye Uaquiñá atšbiama ca.

⁶ Quem Bëngbe Bëtsabe Uaquiñá endmëna nyetscangbiama más uamaná. Chca Bëngbe Bëtsá tojánayana, chabe natsana Uaquiñá quem luaroye cháúashjanguama cha tojanma ora:

Bëngbe Bëtsabe nyetsca angelënga cha chamotsatschuaná ca.

⁷ Y chabe angelëngbiama, mëntsá tojánayana:

Atše sëndama atšbe angelënga, chë atšbe buayiyayënga, mo binýiëngcá chamotsemnama,

y chënga, atšbe oservëngënga, mo iñëjëngcá ca.

⁸ Pero chabe Uaquiñabiama Bëngbe Bëtsá tojánayana:

Utabná, acbe amëndayana nyetsca tescama echántsemna,

y aca nyetsca soyënguiñe condbétsemandaye, ntšamo tšabá yomncá jtsamëse.

⁹ Aca icontšena ntšamo tšabá yomncá nyetsca soyënguiñe jtsamama, y sempre chca jtsamama tša icoboše,

pero n̄ya tondayama cmondogustana bacna
soyēnga jtsamana, chē ndayá Bēngbe Bētsá
ndoñe yondboše soye;

chíyeca Bēngbe Bētsá tcmojabocacá,
y tojama aca puerte oyejuayá chacotsemnama,
chē ín̄yēngbiamá más oyejuayá ca —Bēngbe Bētsá
tojánayana.

¹⁰ Bēngbe Bētsá mēntśánaca chabiamá tojánayana:
Utabná, quem luare jobojátśama ora, aca quem
luare tconjanma,
y lempe chē celoca yomna soyēngnaca.

¹¹ Lempe chē soyēnga n̄yets tempo ndoñe
queochátsmēna;

aca n̄yetsca tescama cochántsemna.
Lempe chē soyēnga echanjopochóca, mo tojuatan-
guaná entśayacá.

¹² Aca chē luarēnga cochanjátrocaye, mo tsmēcá
cuafjabiamcá.

Chca, chē luarēngaca cochanjama, mo entśayá
tcojtenējonētse y tcojenotrocacá.

Pero aca n̄yets tempo cach aca cochandesomñe,
y n̄yets tempo vida cochandesóbomñe ca —cha
tojánayana.

¹³ Bēngbe Bētsá ndocna te ndocna ángelbioye
mēntśá tbonjaniyana, ntśamo chabe Uaquiñábioye
tbojaniyancá:

Atśbe catśbioica cochtsetbemana,
acbe uayayēnga acbe cucuatśiñe chamoquedama
atśbe obenánaca chjamēntscuana ca.

¹⁴ Ndegombre, n̄yetsca angelēnga espíritēnga
mondmēna Bēngbe Bētsá jasérviama, ndēmuan̄yēnga
cha tojanichamó bēnga jabújabuachama, chē
atsebácanēnga mochtsemnēngbe tśabiamá.

2

Canÿe bĕts soye endmĕna atsebácanĕnga jtsemnana

¹ Chíyeca, bĕnga šontsamna sempre Bĕngbe Bĕtsabe soyĕnga jtsuenanana, chĕ bĕnga tmonjouena soyĕnga, chĕ tšabe benachentsana ndoñe chamondojuánama.

² Ndayá Bĕngbe Bĕtsá tempo angelĕngaca entsanga tojanamĕndacá, canÿe ndegombre soye endmĕna, y entsanga entsamna chca jtsobedecánana; y chĕ bacna soye tmojanmĕnga y ntšamo Bĕngbe Bĕtsá tojanmandacá ndoñe tmonjanmĕnga castigo tojanatšatá, chca tmojanma causa; y chca,

³ bĕnga chca bacna soyĕnga tmojtsamĕse, ĵntšamo mochjobenaye jtsejuabnayana Bĕngbe Bĕtsá chama ndoñe šochanjacastígaye ca? Ndegombre cha chca echanjama, bĕnga chábeñe ndoñe tmontsošbuáchese, chĕ bĕts soye jĕftsashjáchama, atsebácanĕnga jtsemnana. Bĕngbe Utabná chĕ natsaná yojtsemna nda entsanga tojanabuayená Bĕngbe Bĕtsá entsanga yochjánatsebacama; y ínÿenga bĕnga šonjanabuayená cachcá ntšamo chábioye tmojanoyeunacá.

⁴ Y Bĕngbe Bĕtsánaca tonjaninÿanÿé, ndayá chĕnga tmojanabuayenacá ndegombre bĕtsemnana, chabe obenana jinÿanÿiyama soyĕngaca, entsanga chamenjnaná soyĕngaca, bĕts soyĕngaca, y entsanga chĕ Uámana Espírítu ainaniñe chamotsebomnana cha jtsamĕse. Chca jamĕse, cada ona chaotsobena jamama ntšamo Bĕngbe Bĕtsá yobošcá.

Bëngbe Bëtsá tojanma Jesucristo entsangcá chaotsemnama

⁵ Bëngbe Bëtsá angelënga ndoñe tonjubuáyana chamotsemándama ndayá quem luarentse yochtsemniñe, lempe mo tsmécá chaotsemnama Bëngbe Bëtsá chaojama ora, chë ndayama mora bënga montsoyebuambná.

⁶ Chamna, ínÿoca Bëngbe Bëtsabe uabemana palabrenguiñe mëntsá endayana, ntšamo chábioye canÿa tbojaniancá tojánayana:

Entšanga ndoñe yapa uámanënga quemátsmëna, as
¿ndáyeca tša chëngbeñe cuanjésejuabnaye?
Chënga entsanga mondmëna. ¿Ndáyeca tša chënga
cuanjésanÿena?

⁷ Aca tcojama entšá puerte uamaná chaotsemnama, y chë angelëngna nÿe batšatema chabiamá más uámanënga mondmëna.

Aca tcojama cha puerte uamaná y respeto merecido bonná chaotsemnama,

⁸ y cha chaotsemándama nÿetsca chë inÿe soyënguiñe, chë quem luarentse aca tcojamiñe –chiñe canÿa tojánayana.

Entšá lempe chaotsemándama Bëngbe Bëtsá tojanma ora, tondaye tonjáboshjona entšáftaca ndëmandana soye ca. Pero mëntscoñama ndoñe nÿa chca quemëntinÿe, chë entšá lempe ntšamo quem luarentse yomncá jtsemándayana.

⁹ Pero bënga mondëtatšëmbo y corente mondonÿá Jesús aíñe chca tojanmama. Bëngbe Bëtsá tojanma cha nduamaná chaotsemnama, mo canÿe entšacá, baseftayté chë angelëngbiamá más batšá uamaná. Bëngbe Bëtsá, entsangbe tšabiamá jtsejuabnaye, yojánboše Jesús chaóbanama, corente jasúfriase;

Bëngbe Bëtsá yojánboše cha chca chaomama, nyets luarentša entsangbe tšabiamama. Y Jesús ya chca tojánmayeca, Bëngbe Bëtsá ya tojinÿanyé cha puerte bëtsá y uamaná bëtsemnama.

¹⁰ Nyetsca soyënga yobinÿna Bëngbe Bëtsabiamama y chábeyeca. Tšabá enjamna, Bëngbe Bëtsá jamana Jesucristo chaotsemnama lempe ntšamo entsanga tmojtsajabotcá, nda chëngbe bacna soyënguentsana cháuatsebacama. Bëngbe Bëtsá chca tojanma, Jesús, chë entsanga atsebácanënga jtsemnama unachayá, chaosufrima jamëse, chca, ba entsanga celoca, mo chabe basengcá, cháftaca bëtsëtsanga chamotsemnama.

¹¹ Er Bëngbe Bëtsá cach Taitá nyetscangbiamama endmëna: Jesús, chë entsanga Bëngbe Bëtsábengama chamotsemnama iuamabiamama, y chë entsanga chca chamojtsemnëngbiámnaca. Chíyeca Jesús, Bëngbe Bëtsabe Uaquiñá, ndoñe ntsëuatjana chëngbioye catšátanga ca jtsachembuanama.

¹² Bëngbe Bëtsabe uabemana palabrenguiñe Bëngbe Bëtsábioye cha mëntšá tbojanianyana:

Atšbe uabentsëngbeñe acbiamama
chanjóyebuambaye,

y jacántase chochanjëtšchuaye, ácbioye
adórayënguentsë ca.

¹³ Y mëntšánaca cha Bëngbe Bëtsabiamama tojánayana:

Atše atšbe Bëtsábeñe chantsošbuáchiye ca.

Y más chcoye mëntšá tojánayana:

Muentše Bëngbe Bëtsabe básengaftaca sëntsemna,
chë atšbe cucuatšiče tojábashesjuanënga, atše
jtsanÿenama ca.

14 Quem Bëngbe Bëtsabe básenga nyetsca entsangcá mondménayeca, Jesúsnaca canye entsá chëngcá tojanóbema. Cha chca tojanma, jóbanëse, chë entsanga jóbanama chaotsamnana obenana bomná Satanás, jayénjanama.

15 Y chca, cha tojama chë jóbanama y ndayá chentšana yochjopásama auatjënga ndoñe chamondëtsauatjama; chënga nyets tempo corente ngménaca imnoyena, jóbanama auatja causa.

16 Er ndegombre, cha ndoñe tonjánabo chë angelënga jabújabuachama, ndayá chë Abrahám bentsana entsángbioye.

17 Y chama cha ibojamna jtsemnana nyetsca soyënguiñe cachcá mo chabe uabentsëngcá, chë entsanga, chca, jobenayama jtsemnana chëngbiamá mo bachnangbe canye más uámana amëndayacá, Bëngbe Bëtsá jtseimpadánama chëngbioye chëngbe bacna soyëngama cháuaperdonama, puerte lastemado mëná y sempre ntšamo Bëngbe Bëtsá tbojauyancá amá. Chca, cha jóbanëse jamama entsanga chamobenama perdonánënga jtsemnana, y chca, jobenayama Bëngbe Bëtsáftaca tšabá tempcá jtsemnëngama.

18 Y mora cha entsobena, ndëmuanyënga bacna soye jamama tojócochenguënga jujabuáchana; cha chca entsobena, er cachánaca tojansufrí, cha bacna soye chaomama Satanás tša yojtsentsëna ora.

3

Cristo Moisesbiamá más uamaná endmëna

1 Chíyeca, Jesucristbeyeca catšátanga, Bëngbe Bëtsábënga, ndëmuanyënga Bëngbe Bëtsá

tojáchembo chabe entšanga chamotsemnana, corente Jesucristbeñe šmochjésejuabnaye. Cha endmëna nda Bëngbe Bëtsá bëngbioye tbojanichmó, y nda bëngbiana yomna mo chë más uámana bachnangbe amëndayacá, Bëngbe Bëtsábioye jtseimpadánama bacna soyëngama chašotsaperdonama. Cha chca endmëna chë bënga mondošbuaché soyënguiñe y chë mondbáyana ndegombre yomna ca soyënguiñe.

² Er Jesús nyets tempo tojanma ndayá chaotsamama Bëngbe Bëtsá tbojaniancá, Bëngbe Bëtsá, nda tbojanábuayana chca chaoservema, cachcá ntšamo Moisés tojanma ntšamo Bëngbe Bëtsá tbojanmandacá, chabe entšángbioye cháuaservema.

³ Canye yebna jebuaná chë yebnama más uamaná jtsemnana; cachcá Jesús, nda inétsama entšanga Bëngbe Bëtsábenga chamotsemnana, más jtsomerecénana Bëngbe Bëtsá cha puerta bëtsá y uamaná bëtsemnana cháuinñanñema, nye ntšamo Moisés, canya Bëngbe Bëtsabe entšanguentsá yojanomerecénama.

⁴ Ndëmuanñe yébnënaca canye jebuaná jtsebomnana, pero Bëngbe Bëtsá endmëna nda tojanma lempe ntšamo yobinñncá.

⁵ Moisés yojtsama ndayá chaotsamama Bëngbe Bëtsá tbojanmandacá, tšabe oservenacá nyetsca Bëngbe Bëtsabe entšángbeñe, y yojamna canya corente tatšëmbuá ndayá más chcoye yochjanopásama, ndayá Bëngbe Bëtsá yochjánayana.

⁶ Pero Cristo, ndayá Bëngbe Bëtsá tobošcá jamana, chë Bëngbe Bëtsabe entšángbeñe

Uaquiñacá jtsemándayëse, ntšamo canÿe uaquiñá jtsemándayana ndayá nÿetsca chabe pamíllanga tmojtsamiñe; cha, chë Uaquiñacá y chënga chë Bëngbe Bëtsabe pamillentšëngcá. Bënga chë pamillentša entsanga jtsemnana, bënga chë ndayá tmošbuáchema bëts añémoca sempre tmojtsóyebuambnase, y sempre Bëngbe Bëtsá tšabe soyënga bëngbiama yochjamama tmojtsobátmanëse, y bënga chca jtsebomnama puerte oyejuayënga tmojtsemnëse.

Chë jóchnama uámana luare Bëngbe Bëtsabe entsangbiama

⁷ Chcasna, ntšamo chë Uámana Espíritu Bëngbe Bëtsabe uabemana palabrenguiñe tojanayancá:

Mënté tšëngaftanga ndayá Bëngbe Bëtsá tojtsichamcá šmojouenëse,

⁸ ndoñe šmattsama, Bëngbe Bëtsabe buayenana soyënga tšëngaftangbe ainaniñe ndoñe chaondómashënguama,

mo chë entsanga ndoyena luaroca Moisésoftaca imojëftsemnëngcá, Bëngbe Bëtsabe contra nÿetsca soyënguiñe imojtsemna.

Chënga bëtscá bacna soyënga tmojanma, mo ndayá cuaftsamcá jinÿama ntsachetšá más muanjobenaye jamana y Bëngbe Bëtsá cabá uantado chëngaftaca tayojtsemnama.

⁹ Bëngbe Bëtsá tojánayana: “Chentše, tšëngaftangbe bëts taitanga bëtscá monjánama jinÿama ndayëntscoñe atše uantado chëngaftaca tsjamnama;

chca chënga tmonjanma, masque canta bnëtsana
uatëntscuana chënga chentše tmonjáninÿe
chë atše sënjánama bëts soyënga.

10 Chíyeca, atše chorsca entsángaftaca šonjánetna y
sënjánayana:

‘Tšëngaftanga mora átšeftaca ndoñe queśmátajna,
mo chë otšenënga tmojtsemnëngcá,
y ndoñe šmonjábosena jtsiyenana ntšamo atše ts-
bošcá jtsamëse.’

11 Chíyeca, atše chëngaftaca etonaná sënjánayana,
mo nda cuafjajuracá,
chënga ndocna te mochjëftsashjache chë átšeftaca
jóchnama uámana luaroye jashjanguama ca”
—cha tojánayana.

12 Jesucrístbeyeca catšátanga, yejuana
šmochtsantješna ndocná tšëngaftanguentšá
chaondëtsebmna canÿe ainana bëtscá bacna
juabnëngaca, y chë causa chaotsemna Bëngbe
Bëtsábeñe ndošbuachiyá, y Bëngbe Bëtsábentšana,
chë sempre iuetsemnábentšana chaotsojuánañe.

13 Chamna, nÿetscanga añemo
šmochtsatenatšetnaye cada te, chë bënga
imobena Bëngbe Bëtsá joyeunayama tempo
imoyenëntscuana, chë Bëngbe Bëtsabe
uabemana palabrënguiñe “mënté ca”
uabaina tempo. Chca cmontsamna, ndocná
tšëngaftanguentšá chaondëtsamama, Bëngbe
Bëtsabe buayenana soyënga ainaniñe ndoñe más
chaondómashënguama, bacna soyënga jamama
juabnëngaca ingñená.

14 Er, ndayá Jesús chabe amëndayoca
yobomnentšana bënga chamóyëngacñamna,

bënga šontsamna sempre ainaniñe corente jtsetatsëmbuana Jesusbe soyënga ndegombre soyënga bétsemnama, ntšamo bënga chábeñe jtsošbuáchiyama tmonjanontšé ora monjanamcá.

¹⁵ Ntšamo Bëngbe Bëtsabe uabemana palabrënguiñe endayancá:

Mënté tšëngaftanga ntšamo Bëngbe Bëtsá tojtsichamcá šmojouenëse,

ndoñe šmattsama, Bëngbe Bëtsabe buayenana soyënga ainaniñe ndoñe chaondómashënguama,

mo chë entšanga ndoyena luaroca Moisésoftaca imojëftsemnëngcá, Bëngbe Bëtsabe contra nyetsca soyënguiñe imojtsemna ca.

¹⁶ ¿Y ndëmuanyënga imojamna, chë Bëngbe Bëtsá tojanëyancá tmojanuenentšana, nyetsca soyënguiñe chabe contra imojtsanmëna? Co chë Moisésbeyeca Egiptocana tmojánbocanënga.

¹⁷ ¿Y ndëmuanyëngaftaca Bëngbe Bëtsá etonaná canta bnëtsana uatëntscuana yojtsemna? Co chë bacna soyënga tmojanmëngaftaca, ndëmuanyënga entšanga ndoyena luaroca tmojanóbana y chëngbe cuerpo chentše tojanoquedá.

¹⁸ ¿Y ndëmuanyënga tojanëyana, mo nda cuafjajuracá, chënga ndocna te mochjéftsanashjache chë cháftaca jóchnama uámana luaroye jashjanguama ca? Co chë ndëmuanyënga ntšamo cha tojanmandacá ndoñe tmonjanmënga.

¹⁹ Y ndegombre, bënga montsobena jinýama chënga ndoñe tmonjéftsanashjache chë cháftaca jóchnama uámana luaroye jashjanguama, Bëngbe Bëtsábeñe ndoñe imontsošbuaché causa.

4

1 Chíyeca, bënga chë Bëngbe Bëtsáftaca jóchnama uámana luare jashjáchama cabá imobenëntscuana, ntšamo cha šojanašebuachenacá cachcá mëntscoñama iuétsemna, puerta cuedado mochtsebomna, nderado ndánaca tšëngaftanguentsá ndoñe nanjobenaye chca jashjáchama.

2 Er bëngnaca chë tšabe noticiënga tmonjouena, cachcá chë Bëngbe Bëtsabe buayenana soyënga chëngbe ainaniñe ndoñe chaondómashënguama tmojanmëngcá; pero chënga chë buayenana soyënga tmojanuena ora, ndocna tšabe soye chëngbeñe tonjanopasá, er chca tmojanuena ora, chë palabrënguiñe ndoñe montsanošbuaché.

3 Pero bënga, chë Jesucristbeñe tmojošbuachengna, mochanjobenaye chë jóchnama uámana luaroye jashjanguama, chë ndayama Bëngbe Bëtsá tojánayana, chë tempo chábioye chca tmojtsanábotengbiama cha mëntsá tojánayana ora:

Chíyeca, atše chëngaftaca etonaná, sënjánayana mo
nda cuafjajuracá,
ndegombre chënga ndoñe mochjëftsashjache chë
jóchnama uámana luaroye jashjanguama ca.
Pero cha chabe trabajo tojanpochocá, quem luare
tojanma ora;

4 er Bëngbe Bëtsabe uabemana palabrënguiñe cánÿentše mëntsá endayana, chë canÿsëfta tianoye ndayá cha tojanmama:

Bëngbe Bëtsá nÿetsca trabajëngama tonjanochná
chë canÿsëfta tianoye ca.

5 Y cachentše Bëngbe Bëtsabe uabemana palabrënguiñe endayana, chë tempo chábioye chca tmojtsanábotengbiama:

Chënga ndocna te quemocháisashjache chë átseftaca jóchnama uámana luaroye jashjanguama ca.

⁶ Chë entsanga monjamna chë natsanënga chë tsabe noticiënga jouenama, pero chë Bëngbe Bëtsáftaca jóchnama uámana luare ndoñe tmonjëftsashjache, ntšamo cha inabošcá chënga ndoñe tmonjanma causa. Chcasna, cabá ndegombre endëtsomñe báseftanga, chë Bëngbe Bëtsá tojánayana soyënguiñe tmojtsošbuáchenga, mochjëftsashjache chë Bëngbe Bëtsáftaca jóchnama uámana luaroye jashjanguama.

⁷ Chë entsanga ndoyena luaroca, Bëngbe Bëtsá entsanga tojánachembo chë cháftaca jóchnama uámana luaroye chámuamashjnama, y chentšana ba uatëse cha cachiñe canye tempo tojuinýnaná, chora entsanga chamobenama chë cháftaca jóchnama uámana luaroye jashjajnama, chë cha “mënté ca” tojanabaye tempo. Cha chca tojanma Davidbiajana jóyebuambayëse, David Bëngbe Bëtsabe uabemana palabrenguiñe mëntsá tojánayana ora:

Mënté tsëngaftanga, ndayá Bëngbe Bëtsá
tojtsichamcá šmojouenëse,
ndoñe smattsama, Bëngbe Bëtsabe
buayenana soyënga ainaniñe ndoñe
chaondómashënguama ca.

⁸ Josué, Israeloca entsanga Canaán fshantsëngoye yojtsënachaye ora, chë Bëngbe Bëtsáftaca jóchnama uámana luare jtsebomnama cha choca matëñjanmëse, Bëngbe Bëtsá bayté chentšana, David yojëftsiyena ora, inye tempuama ndoñe

matënjanoyebuambá, chë ndaye ora entšanga muanjobenaye chë cháftaca jóchnama uámana luare jashjáchama.

⁹ Y chca, cabá endmëna canÿe uámana luare ndayentše Bëngbe Bëtsabe entšanga mochjobenaye cháftaca jóchnama, ntšamo Bëngbe Bëtsá tojanochnacá, chë quem luare jamama nÿetsca trabajënga tojanpochocá ora;

¹⁰ er nda tojashjache chë Bëngbe Bëtsáftaca jóchnama uámana luaroye jashjanguama, cha jóchnana chë Bëngbe Bëtsá tbojanmandá jamama trabajëngama, ntšamo Bëngbe Bëtsá tojanochnacá, chë quem luare jamama nÿetsca trabajënga tojanpochocá ora.

¹¹ Chíyeca, šontsamna lempe ntšamo tmojobenacá jamana chë jóchnama uámana luare jëftsashjáchama, ntšamo chë Bëngbe Bëtsábioye ndoñe tmonjanoye-unangcá ndocná chaondétsamama, y chë causa chënga chë soye ndoñe tmonjëftsashjache.

¹² Er Bëngbe Bëtsabe palabra endmëna mo canÿe aina soycá, nÿets tempo entšángbioye ndayánaca jtsabuátambayana, y bëtscá jamana corente obenánaca, y ndocna te nÿe bonamente chë palabra jóyebuambayana. Mo chë nÿets utoicajana más efsana espadëjaquëcá, jobenayana puerte jashenoye jatëtšana canÿe cuerpo tcojatëtše ora, cachcá y cabá puerte más Bëngbe Bëtsabe palábraca, cha bënga jinÿanyiyana ntšamo bënga nÿe bëngbe ainaniñe tmojtsejuabná y tmojtsebošcá, y chë ndocnábioye tmonjinÿinÿé sóynaca; y chë palábraca cha endobena jáuyanana ntšamo bënga tmojajuabó y tmojabošencá aíñe o ndoñe tšabá bétsemnana.

13 Ntšamo Bëngbe Bëtsá tojamentšana tondaye quenátopodena chabiana iytëmenana jtsemnana. Bëngbe Bëtsá lempe bominÿe iuetsequëcñá, y nÿetsca soyëngama y nÿetscangbiana lempe yotátšëmbo; Bëngbe Bëtsá, ndábioye šojtsamna sempre jojuana ndáyeca canÿe soye chca tmojamama.

Jesús endmëna chë más uámana bachnangbe bëts amëndayá

14 Jesús, Bëngbe Bëtsabe Uaquiñá celoye tojámashëngo, y mora cha endmëna nda chabe delante siempre bëngbiana ibuétseimpadana, mo chë bachnangbe canÿe más uámana amëndayacá. Chíyeca, bënga šontsamna siempre chábeñe jtsošbuáchiyana, ntšamo bëngbe ndegombre ošbuáchiyana yomncá, chë ndayama bënga nÿetsca entšángbeñe tmojayana.

15 Er chë bëngbiana impadaná, mo bachnangbe canÿe más uámana bëngbe amëndayacá, Jesús, yobena bëngbiana jóngmiana, bënga inÿe ora ndoñe yapa obenana tmontsebmna ora, tšabe soye o ndaye sóynaca jamama. Chca endmëna, er Satanás tša yojtsentšena Jesúsbioye ba juabnënga chabotsontšáshjauanama, jayëñjanama bacna soye chaomama, nÿetsca juabnënga ntšamo bëngnaca mondbetsebmncá, pero Jesús ndocna te ndocna bacna soye tonjëftsema.

16 As, ndauatjca Bëngbe Bëtsá mochjótšëmbona, mo chábioye cuaftsobecocnangcá; cha canÿe uámana tbemaniñe yojtsetbemana canÿe bëts reycá; chca mochjama, bënga chášualastemama,

y bēngbiana tšabe juabna jtsebomnēse, chašújabuachama bēnga chca chašojtséjaboto ora.

5

¹ Ndēmuanýe bachnangbe más uámana amēndayánaca jtsemnana entšanguentšana bocacáná, y uabuayaná chēngbe cuenta Bēngbe Bētsá jasérviana, chábioye juatsēmbonama y bayēnga jobáyama Bēngbe Bētsá jētschuayama, chca, Bēngbe Bētsá chē bacna soyēnga entšanga tmojamama cháuaperdonama.

² Chē bachna jtsoberenana jóngmiana, chē bacna soyēnga amēngbiana chama ntsetatšēmbcá, y chē bacna soyēnga jamama ingñénēnga imomnēnga, mo otšenēngcá imomnēngbiana, er cachánaca inýe ora ndoñe yapa obenana ntsebomnana, chē bacna soyēnga jamama juabnēngama jtocochbuáchama.

³ Y chíyeca cha jtsemnana bayēnga jobáyama Bēngbe Bētsá juatsēmbonama, ndoñe nýe entšángbioye bacna soyēngama cháuaperdonama, ndayá chábioye chaboperdonámna.

⁴ Ndocná quenátobena cachá quem uámana trabajo jentsetayana, bachnangbe más uámana amēndayá jtsemnana; cha jtsemnana, Bēngbe Bētsábeyeca uabuayaná chca uámana trabajo jamama, ntšamo ndegombre Aarónoftaca tempo cha tojanmcá.

⁵ Cachcá, Cristo ndoñe cachá tonjanenábuayana jtsemnana chē Bēngbe Bētsabe delante sempre bēngbiana impadaná, mo bachnangbe canýe más uámana amēndayacá, ndayá Bēngbe Bētsá tbojanábuayana chē uámana trabajo jtsebomnana. Cha endmēna nda Jesúsbioye mēntšá tbojaniana:

Aca atšbe Uaquiñá condmëna.

Mënté entšanga sënjinÿanÿé aca atšbe Uaquiñá
comnama ca.

⁶ Y ínÿocnaca, Bëngbe Bëtsabe uabemana
palabrënguiñe mëntšá tbojaniyana:

Aca nÿetsca tescama canÿe bachna condmëna,
canÿe bëts bachna ntšamo Melquisedec yojamncá
ca.

⁷ Jesús quem luarentše yojëftsiyenëntscuana,
cha juayebuáchëse y shëchbuíyeca Bëngbe
Bëtsáftaca ibnëncuentaye y ibnaimpadana, cha chë
jobanámentšana jatsbocama yojanobená; y Jesús
ntšamo Bëngbe Bëtsá yojanbošcá tojánmayeca
y tša respeto chabiana bómnayeca, chábioye
tbojanoyeuná.

⁸ Chca, Cristo masque Bëngbe Bëtsabe Uaquiñá
inamna, jasúfriase tojanábouinÿe ntšamo jamana
ndayá Bëngbe Bëtsá tojtsebošcá.

⁹ Chca, Bëngbe Bëtsá chábioye tbojánbema
lempe ntšamo entšanga tmojtsajabotcá, nda
chëngbe bacna soyëngama cháuatsebacama;
chentšana cha, Cristo, tojanma lempe ntšamo
yojaniytcá, nÿetscanga chë entšanga chábioye
imojánëyeunanënga chamotsobenama nÿetsca
tescama atsebácanënga jtsemnama;

¹⁰ y Bëngbe Bëtsá tbojanábuayana, chë chabe
delante sempre bëngbiana impadaná, mo bach-
nangbe canÿe más uámama amëndayacá chaotsem-
nama, canÿe bëts bachna ntšamo Melquisedec
yojamncá.

Resjo endmëna, ošbuáchiyana jtsajbanana

¹¹ Bëtscá entsemna quem palabrama
jóyebuambayama, pero chë soyënga jayanama

ntšamo tšëngaftanga catafjosertaycá, ndoñe paselo quenátsmëna, er tšëngaftangna nÿa uenana Bëngbe Bëtsabe soyëngama jósertana.

¹² Tšëngaftanga ya bayté Jesucristbe soyëngama šmotátšëmboyeca, tšëngaftanga cmontsamna ya jtsobenana ínÿengbioye chë soyënga jtsabuátambayana; pero tšëngaftanga cmontsëjaboto ndánaca Bëngbe Bëtsabe soyëngama cachiñe chacmëtëtabuayená, chë jtsošbuáchiyama šmojontšé ora natsana jshauatsjínÿana soyëngama. Y chca, tšëngaftanga šmojobiama mo šešonatëmëngcá, jtsëjabótana létšiyë jofšiyana y ndoñe jobenayana jasana chë jabmuánama ndoñe paselo tontsemna soyënga.

¹³ Chë nÿetsca soyënguiñe ntšamo tšabá yomncá jtsamama buatëmbana soyënga ndoñe tontsabuatmá cha, jtsemnana mo canÿe šešonatëmcá, nda vida jtsebmnnana nÿe létšiyë jtseftmanëse.

¹⁴ Pero chë tmojtsobena jajuaboyana y jtsetatšëmbuana ndayá tšabá yomna o ndayá ndoñe tšabá jamama, chca jtsamëse tmoyenamna, chënga jtsemnana mo bëtsëtsangcá, ndëmuanÿenga ndayánaca jasana, chë ndoñe paselo jabmuánama soyëngnaca.

6

¹ Chcasna, bënga šontsamna jtsajbanana nÿe jésebošana jtsatsjëndayana Cristbe buatëmbana soyënga, chë bënga chábeñe jtsošbuáchiyama tmojanontšé ora tmojanatsjinÿe soyënga, y šontsamna jtsatsjëndayana chabiama nÿetsca soyënga, más totcá josértama yomna soyënga. Chca, bënga mochántsemna mo chë bëtsëtsangcá,

ndayánaca jtsesayana. Ndoñe más nÿe chë natsana buatëmbana soyëngama mattsatsjëndaye, mo chë ndayá yomna bacna soyënga jtsamana y chë bënga ndoñe vida ntsebomnama junatsana soyënga amana jtsajbanana, y chë tšabe benache jtishachana; o ntšamo Bëngbe Bëtsábeñe jtsošbuáchiyana;

² chë juabáyana ndayá yomna; chë ínÿabe bestšašniñe cucuatšënga jacjayana Bëngbe Bëtsábioye chabiamana jaimpádama; chë obanënga jtayenama Bëngbe Bëtsá yochjamama; y mocna ora ntšamo entšanga tmojamama Bëngbe Bëtsá yochjayanama, chënga chë nÿetsca tescama yomna tšabe vida chamotsebomnama o nÿetsca tescama castigánënga chamotsemnama.

³ Y bënga chca fchanjama, chë más totcá yomna josértama soyënga jtsabuátambayana, Bëngbe Bëtsá chca chašojálesenciase.

⁴ Ndëmuanÿënga, canÿe ya chë Bëngbe Bëtsabe ndegombre soyënga tmojanóyëngacñe, y chë Bëngbe Bëtsabe ba tšabe soyëngnaca, chábënga bëtsemnama, y chë Uámana Espíritu chëngbe ainaniñe chaotsemándama imobomna,

⁵ y chë Bëngbe Bëtsá ntšamo tojašebuachenacá sempre inétsamama tmojinÿe, y ndëmuanÿënga tmojáninÿe Cristo jtsamana bëts soyënga chabe bëts obenánaca, chë ndaye obenánaca cha puerte bëts soyënga yochjama cha quem luaroye yochjésabo ora,

⁶ chënga Jesucristbeñe ošbuáchiyana lempe tmojtsajbanase, tondaye quenátsmëna ndayá jamama cachiñe Bëngbe Bëtsábioye jtobéconama; er Bëngbe

Bëtsabe Uaquiñá chca stëtsoye jaquédana, y jtsemnana mo Bëngbe Bëtsabe Uaquiñábioye cachiñe chënga tmojtsecrucificacá, y entšanga cachiñe cha chamotsáboyejuanama chënga cuaafjamcá.

⁷ Smochjinÿe: fshantse jamana chë ba uafténënga chiñe chaómashënguama, y chë chiñe trabájayëngbiamama bëtscá jaja sananga tojóboecnëse, Bëngbe Bëtsá jamana, chë fshantsentsana bëtscá tšabe soyënga entšangbiamama chaotsebínÿnama.

⁸ Pero nÿe uchmašëshangá y matënga uchmëfjangaca chiñe tojuábocnëse, chë fshantse tondaye ntsámanana; y nderado Bëngbe Bëtsá nanjama chiñe ndocna tšabe mata chaonduábocnama, y cabana, entšanga chiñe mochantsashaniñá. Cachcá, chë ošbuáchiyana tmojtsajbananga castigánënga mochántsemna.

Bëngbe Bëtsábeñe sempre chamotsobátmanama y ainaniñe bëtscá añemo chamotsebomnama

⁹ Pero masque chca montsoyebuambná, atšbe bonshánënga, bënga tšabá fsëndétatšëmbo tšëngaftangbeñe chë más tšabe soyënga echántsemna, chë atsbocaná jtsemnana tojtsá cha yobomna soyënga.

¹⁰ Er Bëngbe Bëtsá sempre ntšamo tšabá yomncá nÿetsca soyënguiñe jtsamana, cha ndegombre echántsejuabnaye ndayá tšëngaftanga šmojamama, y chë chabiamama šmojinÿinÿé bonshánama, chabe entšangbioye jtsëjabuáchanëse, ntšamo mórncama šmojtsama.

¹¹ Pero bënga fsëntseboše, cada ona tšëngaftanguentšá, nÿets tempo y Jesús chaojésabëntscuana chaotsinÿanÿná corente

yoboše chca jtsamama, Bëngbe Bëtsábeñe chca jtsošbuáchiyëse, chábeñe sempre chašmotsobátmanama, tšëngaftangbe tšabiama cha chaomama.

¹² Ndoñe queftsátsboše tšëngaftanga oyënjayënga chašmotsobiama chë Bëngbe Bëtsá tcmojabanýe trabajo jtsamama, ndayá Jesucristbeñe ošbuáchiyana bomnëngcá y padecena soyënguñe uantado mënëngcá šmochtsama. Chca, chënga mochanjóyëngacñe ndayá Bëngbe Bëtsá jatšatayama tojašebuachenacá, chabe entšanga bëtsemnama.

¹³ Bëngbe Bëtsá Abrahámbioye tbojanšbuachená ora, chca tbojaniyana cachabe uabaina jayanëse, er inýa chabiama más uamaná ndoñe yontsemna ndabiama jajúrama, ntšamo tbojanšbuachenacá ndegombre chaotsemnama;

¹⁴ cha mëntšá tbojanšbuachená: “Aíñe, atše chanjama aca bëtscá tšabe bendicionënga chacot-sebomnama, y chanjama acbentša pamillentšana mallajta entšanga chamotsemnama ca.”

¹⁵ Y chca, Abraham Bëngbe Bëtsábeñe jtsošbuáchiyëse, puerte uantadiñe yojanobátmana ntšamo tbojanšbuachenacá Bëngbe Bëtsá yochjanmama, y pronto chca tojanóyëngacñe.

¹⁶ Entšanga tmojajurá ora, chca jamana chëngbiama canýe puerte más uámanabe uabaina jayanëse, y chca chëngbiama más uamanabiama tmojajurá ora, jtsayanana ntšamo tmojašbuachenacá pronto mochjamama, y chcasna, chama ya ndoñe más ntjatenátsëtsnayana.

¹⁷ Y chca, Bëngbe Bëtsá tojánbošena botamana jinýanýiyana, ntšamo cha to-

janašebuachenacá mochjanoyëngacñëngbioye, ntšamo tojanašebuachenacá cha ndegombre yochjanmama, y ndocna te chë ntšamo jamama yojanjuabnacá yochjantrócama. Chíyeca, botamana tojaninÿanÿé cha chca yochjanmana, cachabiamana jajúrase, chë ntšamo tojanašebuachenacá yochjanmama ndegombre bëtsemnana.

¹⁸ Bëngbe Bëtsabe šbuachenana soye y chama jinÿanÿiyama ntšamo tojanayancá, ntšamo tojanašebuachenacá ndegombre yochjamnama, chë uta soye ndocná ntšobenana jatrócama; y chca tojayana ora, ndoñe ntšopodénana Bëngbe Bëtsá chaobená jobostérama. Y chca, chë uta soyama, bënga bëtscá añemo ainaniñe jóyëngacñana, bënga chë Bëngbe Bëtsábioye tmojobéconanga, cha chásuatsebacama y chašotsanÿenama, mo canÿe bëtš resjuentsana tmojtsachetëngcá, ntšamo chentšana atsebácanënga jtsemnana cuaftsenguacá. Bëngbe Bëtsá šojáuyana bënga imojtsobena chábeñe jtsobátmanama ca, y bëtš añémoca chábeñe jtsošbuáchiyëse, cha yejuana šochtsanÿenama mondobátmana.

¹⁹ Mo ntšamo chë bėjaye asentoca cuedádoca tcojajajo anclama, chë barcuñe enjaquenënga tšabá jtsetatšëmbuana chë barco ndoñe yochántsashatiyiyinama, cachcá bëngnaca, Bëngbe Bëtsábeñe imobátmanama, montsobena ainanoca jtsetatšëmbuana lempe tšabá yotsomñama. Bënga Jesucristbeñe mondobátmana, y Bëngbe Bëtsá yojtsemnoye celoca cha tojámashëngo y chabe delante entsemna mo chë bachnangbe más uámana amëndayacá. Chana jamashënguana chë

Bëngbe Bëtsabe bëts yebnoca, “chë más uámana ca” uabaina luaroye, entsëjua ujonÿana stëtsoica, Bëngbe Bëtsabe delante jtsemnama,

²⁰ ndayentše Jesús celoca, Bëngbe Bëtsabe delante tojámashëngo bëngbe tšabiamama soyënga jamama, bëngnaca chamobenama chabe delante jamashënguama; chca, Jesús tojanóbema chë bachnangbe más uámana amëndayá nÿetsca tescama, canÿe bëts bachna ntšamo Melquisedec yojamncá.

7

Jesús, canÿe bëts bachna ntšamo Melquisedec yojamncá

¹ Quem Melquisedec yojamna Salem puebloca rey y bachna chë celoca Bëngbe Bëtsabiamama; Bëngbe Bëtsá, chë nÿetscangbiamama más uamaná. Abraham chë reyënga y chëngbe soldadëngaftaca imojentsjaná y tojanayënjaná chentšana yojtsatabó ora, Melquisedec tojánbocna cha jajébenguama, y chora Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama.

² Chora Abraham chábioye tbojanatsetá, chë reyëngaftaca imojentsjaná ora, lempe tojanosháchiñtšana, bnëtsanentšana canÿe soye. Chë palabra Melquisedec endayana “nÿetsca soyënguifne tšabá ama rey ca”; y chánaca yojamna Salem puebloca rey, y chca endayana “nÿetscanga natjëmbana chamotsiyenama ama rey ca”.

³ Chabe pamíllangbiamama tondaye quenatótatsëmbo; chca cha endmëna mo ni taitá ni mamá ndoñe endbomnacá, ni bëts taitanga.

Tondaye quenátótatsëmbo ntseco tojanonÿnama, ni ntseco tojanóbanama; chca, inÿe soyënguiñe cha yojamna mo Bëngbe Bëtsabe Uaquiñacá, y endmëna mo nÿetsca tescama bachna cuaftsemncá.

⁴ Y mora, šmochjájuaboye tša uamaná Melquisedec inamnana, er bëngbe tempsca uámana bëts taitá Abraham chábioye tbojanatšetá, chë reyëngaftaca imojentsjaná ora lempe tojanosháchiñentšana bnëtsanentšana canÿe soye.

⁵ Ntšamo Moisesbe leyiñe endëmandacá, chë bachnangbe más uámana amëndayá Leví, Aarónënaca ca uabainabe pamillentšana tmomna bachnanga, jtsamnana chë Israeloca entšángbioye nÿetsca chë tmobomna soyënguentšana bnëtsanentšana canÿe soye jtsayëngacayana; y chca jtsamnana masque chë entšanga cachëngbe pamillentšënga tmomna y Abrahábentšana pamillentšëngnaca.

⁶ Pero Melquisedec, masque Aaronbe pamillentšá ndoñe yonjamna, Abraham, chë ntšamo Bëngbe Bëtsá tbojansbuachenacá tojanóyëngacñabentšana, cha tojanóyëngacñe nÿetsca soyënguentšana bnëtsanentšana canÿe soye, y Bëngbe Bëtsábioye tbojanimpadá, Abraham bëtscá tšabe bendicionënga chaotsebomnama chaomama.

⁷ Y ndocná quenátobena jayanama ndoñe ndegombre yondmëna ca, chë Bëngbe Bëtsábioye impadaná inÿabiama tšabe soyënga chaomama, más uamaná inétsemna chë chca tojóyëngacñabiama, inÿa chabiama Bëngbe Bëtsábioye tbojaimpadá ora.

⁸ Quem tempo, bachnanga mochjóbanënga, entšángbioye jtsayëngacayana nÿetsca chë

tmobomna soyënguentsana bnëtsanentsana canÿe soye, pero chë Bëngbe Bëtsabe uabemana palabra, Melquisedebiana endoyebuambná cha mo canÿa cabá ainá totsomñcá.

⁹ Y bënga montsobena jayanama, Abraham Melquisedécbioye chë nÿetsca soyënguentsana bnëtsanentsana canÿe soye tbojanoyé ora, yojamna mo Leví, chë nÿetscángbioye nÿetsca soyënguentsana bnëtsanentsana canÿe soye ayëngacayá, Melquisedécbioye chca cuaftopagacá;

¹⁰ er cha Abrahambe pamillentśá inamna. Melquisedec yojtsabó ora y chábioye chë lempe tojanosháchiñentsana bnëtsanentsana canÿe soye Abraham tbojanatśetá ora, yojamna mo nÿetscanga, chë Abrahábentsana entsanga más chcoye mochtsaniyenënga, chëngnaca chë bnëtsanentsana canÿe soye cuafjajocá, masque Abraham chca tojanma ora, Leví y chë Abrahábentsana inÿe entsanga cabá ndoñe tmonjanonÿná.

¹¹ Israeloca entsanga Moisesbe ley tmojanáyëngaca, chë bëts taitá Levibe pamillentśënga bachnanga imojamnënga Bëngbe Bëtsá imojtseserverna ora, y chënga monjamna Aarónbentsana entsanga. Ntśamo chë leyiñe yomandancá imojánamënga perdonánënga jtsemnama y Bëngbe Bëtsabe bominÿiñe tśábënga jtsemnama quem bachnanga jamama matmënjanobenase, ndoñe manjanëyta Bëngbe Bëtsá inÿe bachna chabuatschembuama, nda ndoñe yonjamna mo chë bëts bachna Aaroncá, ndayá ntśamo chë bëts bachna Melquisedec

yojamncá.

¹² Er, canye bachnanga Bëngbe Bëtsábioye jtseservénama tmojajbaná y inye bachnanga chábioye jasérvíama tmojatontsé ora, jtseytana chë natsana bachnanga imojanoserverna ora mándaye leyëgnaca jtsetrócama.

¹³ Bëngbe Utabná, ndabíama quem soyënga jtsóyebuambnayana, ndoñe Aaronbe pamillentsá quenjatsmëna, ndayá inye pamillentsá, y quem pamillentsá entsanga ndocna te bachnangcá Bëngbe Bëtsá tmonjanservé, chë altar ndirichiñe Bëngbe Bëtsabe bëts yebnoca.

¹⁴ Er nyetscanga mondétatsëmbo Bëngbe Utabná Judabe pamillentsána bétsemnana, y chë pamíllama Moisés ndocá tonjánayana, Bëngbe Bëtsá mo bachnangcá chënga jtseservénama.

¹⁵ Y ntšamo tmojayancá montsobena más tšabá josértana, er chë tsëm bachna Cristo yojamna canya mo Melquisedec yojamncá.

¹⁶ Cha bachna yojamna, ndoñe chë bachnanga chabe pamillentsána jabocanama yojánamnana canye ley tojánayanayeca, ndayá nyetsca tescama jëftsiyenama cha inobénayeca.

¹⁷ Er mëntsá endmëna, ndayá Bëngbe Bëtsá chabíama tojánayana:

Aca bachna nyetsca tescama condmëna,

canye bëts bachna ntšamo Melquisedec yojamncá
ca.

¹⁸ Cha tojánabo ora, Bëngbe Bëtsá tojanma chë nda bachna jtsemnana y ntšamo josérvíama mandënga chaotsopochocama, er chë mandënga ndoñe ntjobenayana entsanga jujabuáchama

atsebácanēnga jtsemnama, y chca, chēngbiana ndoñe bētsá yonjanoservena.

¹⁹ Er Moisesbe léyeca, entšanga ndoñe tmonjanobená Bēngbe Bētsabe bominyiñe tšábenga jtsemnama, pero mora chama canye corente más uámana soye montsebomna: Jesucristbeñe jtsošbuáchiyēse, chábeñe montsobátmana Bēngbe Bētsáftaca tšábenga chásuabiamama, y chca, Bēngbe Bētsábioye bēnga jtobéconama.

²⁰ Y Bēngbe Bētsá lempe chca tojanma, cachabiamama jajúrase, lempe ntšamo cha tojanayancá ndegombre chaotsemnama. Chē inye bachnanga, chē Aaronbe pamillentšēngbioye tmojanēbuáyana ora, Bēngbe Bētsá ndoñe chca tonjánayana,

²¹ pero mo bachnécá chaoservema Bēngbe Utabnábioye tbojanábuayana ora aíñe; cach Bēngbe Bētsabiamama jajúrase, Bēngbe Utabná canye bachna yochtsemna ca tojánayana. Ntšamo Bēngbe Bētsabe uabemana palabrénguiñe endayancá:

Bēngbe Utabná Bēngbe Bētsá, Jesucristbioye tbojanianyana, cachabiamama jajúrase, ntšamo tojanayancá ndegombre chaotsemnama,

y juabna ndoñe ntjatrócamas:

“Aca bachna nyetsca tescama condmēna ca.”

²² Bēngbe Bētsá chca tojánayanama, Jesúsbeyeca bēnga corente mondētatsēmbo, ndayá Bēngbe Bētsá bēngbiana jamama tojanašebuachenacá, chē Jesúsbioye bēngbe bachna chaotsemnama juabuáyanana, más tšabá yojtsemna chē ndayá tempo cha chabe entšangbiana tojanašebuachená soyama.

²³ Chë inÿe bachnanga banga imojamna, er ndocná yonjanobena Bëngbe Bëtsábioye nÿetsca tescama chca jtseservénana; cada ona básefta uatëngama tojëftsanoservé, tojanóbana y ínÿabioye chë trabajo jatontšabuáchana.

²⁴ Pero Jesús ndocna te ntjobanámayecna, cha mo bachnécá Bëngbe Bëtsábioye nÿetsca tescama bochjëftservesena, y ndocna te chabe trabajo ínÿabioye bochanjëftsínÿinÿiye, chë inÿa cachcá jtsamama chauatontšema.

²⁵ Chíyeca, cha yobena nÿetsca tescama játsebacana ndëmuanyënga chábeyeca Bëngbe Bëtsábioye tmojobeconá, er nÿetsca tescama cha echanjëftsiyena Bëngbe Bëtsábioye chëngbiana jtseimpadánama.

²⁶ Chcasna, Jesús ndegombre endmëna lempe ntšamo bënga imuajabotcá nda Bëngbe Bëtsábioye bëngbiana chabotseimpadánama, mo chë bëngbe bachnangbe más uámana amëndayacá. Cha sempre uamaná endmëna, ndocna te ni mo canÿe juabna ínÿabe contra yonjábomna, ainaniñe ndocna bacna juabna yonjábomna, chë bacna soyënga amënguentsana luaroca mëná, y Bëngbe Bëtsá tojanma celoca más bëtsá y obená nÿetscangbiana cha chaotsemnana.

²⁷ Cha ndoñe bonjanájaboto canÿe te y inÿe te bayënga jtsebánayana, Bëngbe Bëtsá chabe bacna soyëngama chaboperdonama y chë bacna soyënga entšanga tmojanmámnaca, mo chë inÿe bachnangbe más uámana amëndayënga mondbetsamcá, cachëngbiana y chë judiëngbiámnaca. Cha tojanma lempe ntšamo yojaniytcá canÿe soye y nÿetsca tescama, entšanga

bacna soyënga tmojanmama perdonánënga chamotsemnana. Cha chca tojanma, chabe derecho vida jtsobomñama cachcá tojanonýná ora; y tojanóbana entšanga chamotsobenama perdonánënga jtsemnana.

²⁸ Ntšamo Moisesbe leyiñe yojanmandacá, chëngbiana mo chë bachnangbe más uámana amëndayëngcá tmojanëbuáyana entšanga inye ora bacna soye amënga; pero Bëngbe Bëtsá cabá chë ley entšangbe cucuatšinë tojanáboshjonentšana baytese, cha chabe Uaquiñábioye chë bachnangbe más uámana amëndayacá tbojanábuayana, cachabiana jajúrase, ntšamo tojanayancá ndegombre chaotsemnana. Bëngbe Bëtsá tojanma chë Uaquiñá chaotsemnana lempe ntšamo entšanga tmojtsajabotcá, nda cháuatsebacama, ndocna te bacna soye ndamá, ni ainaniñe bacna juabnënga ndbomná.

8

Cristo, nda jóbanëse tojanma entšanga Bëngbe Bëtsáftaca mo canyáca chamotsemnana

¹ Chë más uámana soye ndayama bënga montsichamo, chë Cristo mo bachnëcá yomnana montsoyebuambná ora, entsemna: Bënga chábeñe imojtsebomna canya nyetsca tescama Bëngbe Bëtsabe delante bëngbiana impadaná, mo chë bëngbe bachnangbe más uámana amëndayacá, Bëngbe Bëtsabe catšbioica yojtsetbemana jtsemándayama, y Bëngbe Bëtsá chë más uámana tbemanentše.

2 Chë inÿe bachnanga Bëngbe Bëtsabe bëts yebnentše tmojánamashjna chë “más uámana ca” uabaina luaroye, Bëngbe Bëtsabe delante jtsemnama; pero chë luare celoca ndayentše nÿets tempo Cristo mo chë bachnangbe más uámana amëndayacá yoserverna, entšanga ndoñe chca tmonjanpormá, ndayá Bëngbe Bëtsá.

3 Nÿetscanga chë bachnangbe más uámana amëndayënga tmojanëbuáyana, entsangbiana soyënga y tmojóba bayënga Bëngbe Bëtsábioye juatšëmbonama, chëngbe bacna soyëngama perdonánënga chamotsemnama; chíyeca, jtseytana Jesucristo ndayánaca chaotsebomnama, Bëngbe Bëtsábioye juatšëmbonama.

4 Cha quem luarentše tojtsetrabájase, cha ni mo bachna ndoñe nántsemna, er muentše ba bachnanga mondmëna, y chënga ba soyënga jamana Bëngbe Bëtsábioye jëtschuayama, ntšamo jamama Moisesbe leyiñe yomandancá. Y chca, ndoñe nantseyta cha chca chauatoservénama.

5 Chë inÿe bachnanga imobomna luarënga Bëngbe Bëtsá jadórama, y ndaye soyëngaca chënga Bëngbe Bëtsá imoserverna, ndoñe cachcá yontsemna chë ndayentše Jesucristo celoca yoserverna luarcá, ni ntšamo cha yoservencá; nÿe batšatema bëngbioye šuinÿanÿná ntšamo chë celoca luare yomnama, ndayentše Cristo mo bachnëcá yoserverna. Y bënga mondëtatšëmbo quem luarentše chë soyënga chca yomnama, er chë Bëngbe Bëtsábioye jadórama yebna, chë jatsjacama opodena yebna Moisés japórmama ora, Bëngbe Bëtsá mëntšá tbojaniyana: “Cuedado cochtsebomna chë atšbiana yebniñe nÿetsca

soyënga jamama, ntšamo tcbonjaninÿinÿecá chacomama, chë tjoca bonjamna ora ca.”

6 Pero bëngbe bachnangbe más uámana amëndayá Cristo, tojashjache canÿe más bëts trabajo jtsebomnama, ntšamo chë inÿe bachnanga imobomna trabajuama; cachcá, ndayá Bëngbe Bëtsá tojayancá Crísoftaca bëngbiana jamama, bënga tempcá tšabá Bëngbe Bëtsáftaca jtsemnama jtsamëse, puerte más tšabá endmëna, chë ndayá tempo chabe entšangbiana jamama tojanašebuachená soyama. Ntšamo mora cha tojayancá puerte más tšabá entsemna, er tojašebuachená más tšabe soyënga bëngbiana jamama.

7 Chë Bëngbe Bëtsá natsana tojanašebuachená soyëngaca matënjanopodé entšanga chamot-samama ntšamo yojanamncá, ntšamo tojanašebuachenacá jójëngacñama, as ndoñe manjanëyta Bëngbe Bëtsá cachiñe canÿe trato chauátsbemama entšangbiana.

8 Pero Bëngbe Bëtsá tojáninÿe ntšamo yojanamncá entšanga ndoñe tmonjanmama, ntšamo cha tojanašebuachenacá jójëngacñama, y Bëngbe Utabná Bëngbe Bëtsá chëngbiana mëntšá tojánayana:

Canÿe tempo echanjóshjango, y chora Israel y Judabe pamillentša entšangbiana básefta soyënga jamama chanjašebuachená,

chënga átseftaca tempcá tšabá jtsemnama chamotsobenama.

9 Chë chanjašebuachená soye ndoñe queochátsmëna cachcá ntšamo chë chëngbe

bëts taitanga sënjanašebuachená soye enjamncá,
 atše chënga sënjanënatse ora, Egiptó luarocana sënjesanëbuacna ora;
 pero chëngna, ntšamo jamama enjanamncá, chë sënjanašebuachená soye jóyëngacñama ndoñe chemátanma causa,
 atše cachcá chënga sënjesanënyaye ca, Bëngbe Utabná tojánayana.

10 Chë Israeloca entsangbiama ndayá jamama canye tempo chentšana chanjašebuachená soye,

mëntšá entsemna ca, Bëngbe Utabná tojánayana:
 Atše chanjama chë chëngbe juabniñe chaitsemánda soyama chënga chamotse-juabnama,
 y chamotseboše jtsamana ndayá chëngbe ainaniñe chaitsemánda soye.

Atše chëngbe Bëtsá chántsemna, y chënga atšbe entsanga.

11 Chë tempo ndoñe queochátsiyta cányenga ínÿenga chamotsabuátambama,
 cachabe luariñe oyenábioye o cachabe pamil-lentša entsábioye, atše chë chëngbe Utabná chašmotsábuatmama.

Ndoñe queochátsëyta, er nyetscanga uámanënga y nduámanënga,
 corente tšabá atšbe šmochantsábuatma.

12 Chënga chanjálastemaye y chëngbe bacna soyëngama chanjáperdonaye,
 y ndocna te más chë bacna soyënga chënga tmojamama quichátsjuabnaye ca —cha tojánayana.

¹³ Bëngbe Bëtsá, chë entsangbiamama mora jamama tojásebuachenama tojtsichamo ora, chca jtsemnana, er cha tojama chë tempo entsangbiamama jamama tojanašebuachená soye, mora ya ndoñe chaondëtsoservénama; ndayá mo tanguá soycá tojtsemna y ya ndoñe tontsoservena, chë soyna nÿe batšatema más y ya jtsopochócana.

9

Bëngbe Bëtsá jadórama muentša luare y chë celoca luare

¹ Y morna, ndayá Bëngbe Bëtsá tojanašebuachenama y tojanmandá soyama, mandënga yojamna ntšamo cha jtsadoránama, y nÿa chabiamama pormana yebnentše quem luarentše.

² Chiyeca, Bëngbe Bëtsá tojanmandá chaotsemna canÿe jatsjacama opodena yebna chábioye jadórama, mëntšá: Chë natsana tsañe quem Bëngbe Bëtsabiamama yebnentše inauabaina “chë uámana luare ca”; chentše inamna chë canÿsëfta quinÿenëfjuangá castellano candelerësiñe, y canÿe mesésha ndayiñe yojacjana chë luarentše Bëngbe Bëtsá bëtsemnana inÿinÿnaye tandëšënga.

³ Inÿe ujonÿana entsëjua chentšana, inÿe luare inamna; inauabaina “chë más uámana luare ca”.

⁴ Chentše inamna chë castellano altar, incienso jajuinÿiyama, y chë cajontema nÿetsiñe castellanoca pormánëtema. Quem cajontema yojaninÿanÿná ntšamo Bëngbe Bëtsá tojanašebuachenacá, chë Israeloca entsanga chabe uámana entsanga yochjánabiamama, y inauabaina “Bëngbe Bëtsabe šbuachenana

soye inÿinÿnaye cajontema ca”; y chë tsoye quem soyënga inabomna: canÿe castellano jarrëtema, maná ca uabaina tandëseca, chë Bëngbe Bëtsá tojanma celocana chabe entšangbiama chaótsatsama saná; Aaronbe varëfja, chë tojanantsëfjonëfja; y chë ndëtšbé tablëbenga ndayiñe Bëngbe Bëtsá tojanábema chë bnëtsana uámana mandënga.

5 Chë cajontema juatsboca immamna chë juatëngmiášha uabomnënga, mo angelëngcá, “querubinënga ca” uabáinënga, y chënga imojaninÿanÿná chë Bëngbe Bëtsabe buash-inÿinÿanana chéntšnaca bëtsemnama. Chënga, chë juatëngmiášhangaca chë cajontémentša nÿets ústonëtema imojanëtsbotsana; chë ústonëtema inauabaina “entšanga bacna soyënga tmojamama Bëngbe Bëtsá perdonaye luare ca”, er chentše, chë cajontema juatsboca chë bachnangbe más uámana amëndayá jtsamanana buiñe jabuëscjana, chë Bëngbe Bëtsábioye cha ibnaimpadana te, entšanga cháuaperdonama. Pero mora ndoñe quenátsiyta chë soyëngama lempe jatóyebuambnayama.

6 Lempe chca tmojanprontantšana, chë bachnanga sempre chë natsana luaroye imojánamashjuana, jamama ntšamo Bëngbe Bëtsá tojanamëndacá, chábioye jadórama.

7 Pero nÿe chë bachnangbe más uámana amëndayá yojobena chë inÿe luaroye jamashënguana, y nÿe canÿe cada uata. Choye jamashënguama orna, cha ibojamna bayëngbe buiñe juabuyambana, Bëngbe Bëtsábioye juatšëmbonama, chca, chë bachnangbe más uámana

amëndayá tojanma bacna soyënga Bëngbe Bëtsá chaboperdonama, y chë ntsetatšëmbcá entšanga tmojanma bacna soyëgnaca.

⁸ Chca, chë Uámana Espíritu jamana bënga chašósertama, chë natsana luare cabá tojtsemnëntscuana y chë bachnanga cabá chë soyënga chentše tmojtsamëntscuana, nÿetscanga cabá ndoñe tmonjanobená chë inÿe luaroye jamashjnama, chë “más uámana luaroye”.

⁹ Chë soyëngaca jtsopodénana bëngbioye jinÿanÿiyana, chë tempo, chë Bëngbe Bëtsábioye jadórama yebnentše entšanga uta luare imojábomna ora, ndoñe yonjopodena Bëngbe Bëtsabe delante nÿetscanga jatsmënana, mo chë bachnangbe más uámana amëndayacá. Y chë soyëgnaca jtsayanana, chë Bëngbe Bëtsabiana uátšëmbona soyëngaca y bachnanga tmojanóba bayëngaca, ndoñe tonjanopodé jamana canÿa Bëngbe Bëtsábioye adorayá, Bëngbe Bëtsáftaca tempcá tšabá chaotsatsmënana y Bëngbe Bëtsá chabe bacna soyëngama tbojaperdonama ainaniñe corente chaotsetatšëmbuama.

¹⁰ Chënga, chë uátšëmbona soyëngaca y tmojanóba bayëngaca tmojanma nÿe ntšamo Moisesbe leyiñe yojanayancá, ndayá chiñe yojanlesenciancá, ndayá jasama o jofšiyama, y chë cuerpo jabebiana mo tšabe entšangcá Bëngbe Bëtsabe delante jtsatsmënana; nÿetsca mandënga nÿe cuerpama, pero ainanama tondaye ntjama. Pero chë entšanga chca yojánamna jtsamana, nÿe Bëngbe Bëtsá inÿe soyënga, más tšabe soyënga jamama tojamandantscuana, chë tsëm trato tojábema ora.

11 Pero Cristo ya tojánabo, y cha yomna chë Bëngbe Bëtsabe delante bëngbiana impadaná mo chë bëngbe bachnangbe más uámana amëndayacá, chca, bëngbiana chaotsemnama chë tšabe soyënga ntšamo mochjoyëngacñëcá. Chë luare celoca ndayentše cha Bëngbe Bëtsabe delante mo bachnëcá yotrabája, puerte tšabe luare yomna, y chentše cha, ndoñe chë quem luarentše bachnanga imomnëngcá, cha yobena jamana lempe ntšamo Bëngbe Bëtsá entšangbiana jamama injuabnaycá. Chë luare ndoñe entšangbe cucuátšeca yondëpormana, y chca jtsayanana, quem luarentša soye ndoñe yondmëna ca.

12 Cha, canye y nyetsca tescama chë luaroye Bëngbe Bëtsabe delante tojánamashëngo ora, cha ndoñe chivo o ternerbe buiñe tonjanabuyamba, ntšamo chë inye bachnanga imojuamancá; ndayá jóbanëse, chabe buiñe juabuáshanëse, cha tojanma entšanga atsebácanënga jtsemnama chamotsobenama; y chca tojanmëse, cha tojanobená chë luaroye Bëngbe Bëtsabe delante jamashënguama. Y Cristo chca choye tojanamashënguëse, tojanma bënga chë nyetsca tescama yomna tšabe vida jtsebomnama chamotsobenama.

13 Ndëmuanyënga ndayámnaca chë leyama tmojanoquedá mo chë Bëngbe Bëtsabe delante ndoñe tšabengcá, chë bachnanga imojuamana chëngbioye toronga y chivëngbe buiñe jabuéscacjana, y chë altaroca tcojajuinýe ternerabe jatinýá chëngbioye jatbótotana, chca, chënga jábiamama Bëngbe Bëtsabe delante mo tšabengcá. Chca tmojamentšana, chë bachnanga

tmojánayana chënga imojtsobena chë ínÿengaftaca jabama, Bëngbe Bëtsá jadórama, y cachiñe mo tšabengcá Bëngbe Bëtsabe delante imojtsatsmëna ca.

¹⁴ Ndayá bachnanga tmojanmcá yojanámana entšanga cachiñe mo tšabengcá Bëngbe Bëtsabe delante imojtsatsmëna ca jayanama; y chca, chë ínÿengaftaca Bëngbe Bëtsábioye jadórama tmojanobenase, jtsachetšá más yojtsámana Cristbe buiñe, ndémuanÿeye tojanábuashana bëngbiana cha tojanóbana ora! Chë nÿets tempo vida bomná Espíritbe obenánaca, Cristo, chabe derecho vida jtsobomñama cachcá tojanonÿá y bëngbiana tojanóbana. Cha, chë ndocna bacna soye ndbomná, tojanóbana ora yojamna mo canÿe bayá tondaye ndbemaná chë bachnanga cuafjobacá juatšëmbonama, entšangbe bacna soyëngama; cachcá Cristo, chë ndocna bacna soye ndbomná, bëngbe bacna soyëngama jáperdonama tojanóbana. Bëngbiana tojanóbanayeca, Cristo yobena jamama bënga ainaniñe corente tšabá chamotsetátšëmbo, bacna soyënga bënga tmojamama, chë ndoñe vida jtsebomnama bënga junatsana soyënga, chama bënga perdonánënga imojtsemnama, y chca, bënga montsobena jtsiyenana, Bëngbe Bëtsá, chë ndegombre ainá yomná, jtseservënëse.

¹⁵ Chíyeca, Cristo jóbanëse tojama entšanga Bëngbe Bëtsáftaca cánÿiñe mo canÿacá chamotsemnama, ntšamo Bëngbe Bëtsabe tsëm trato yomncá; y chca cha tojama, Bëngbe Bëtsá chabe entšanga chamotsemnama tojáchembënga perdonánënga chamotsemnama, chë Bëngbe Bëtsabe tempsca tratentša ley jtsocumplínama

inamna ora imojoyenentscuana bacna soyënga tmojanmama; y chëngnaca chamotsobenama chë nyëtsca tescama mochtsebomna soyënga jóyëngacñama, ntšamo Bëngbe Bëtsá chabe entšanga tojanašebuachenacá.

16 Ntšamo canye testamentiñe tojtsayancá chaopasamna, jtseytana chaotsótatsëmbo chë chca jamama tojašbuachená cha tojóbanama.

17 Canye testamento tondaye ntsámanana, chë chca jamama tojašbuachená cha cabá ainá tot-somñentscuana; nya cha tojóbana orna aíñe.

18 Chiyeca chë Bëngbe Bëtsabe natsana trato, entšángbeñe tojanoboatsé, chora tmojanóba bayëngbe buiñe jabuéscjese.

19 Moisés chë leyentša nyëtsca mandënga nyëtsca entšanga tojánabuayenantšana, tojanca buángana boboshëshe y hisopo betiyentša buacuafja, chë ternerënga y chivëngbe buiñe búyeshca enajuabnëyiñe tojanfchecuacuá, y chora chë leyënga librëšañe tojanbuéscacja, y nyëtsca entšángbeñnaca.

20 Y mëntšá tojánayana: “Quem buiñe entsinÿinÿná, ntšamo Bëngbe Bëtsá tojamandacá ndegombre yochtsemnama, y tšëngaftangbiana puerta yochtsámanama ca.”

21 Moisésnaca buiñe tojanbuéscacja chë jatsjacama opodena yebniñe, y lempe chentša soyënguiñe, chë ndaye soyënga Bëngbe Bëtsábioye jadórama tojanoservena.

22 Er ntšamo leyiñe iuayancá, yojtsemna nya mo nyëtsca soyënguiñe buiñe jabuéscacjana, Bëngbe Bëtsábioye jadórama tšabá chaoservema; y buiñe

ndoñe tonjuábuashanësna, ndoñe ntsopodénana entšanga bacna soyëngama perdonánënga chamotsemnama.

Cristo jasúfriase y jóbanëse, tojanma entšanga bacna soyëngama perdonánënga chamotsemnama

²³ Chíyeca jtseytana chë Bëngbe Bëtsábioye quem luarentše jadórama soyënga, chë bachnanga chamoma, Bëngbe Bëtsábioye jadórama tšabá chaoservema, chë Bëngbe Bëtsábioye jëtschuayama tmojóba bayëngbe buíñeca. Chë soyënga batšatema jtsinÿanÿnayana ntšamo chë celoca luare yomnana Bëngbe Bëtsabe delante, ndayentše Jesús yoservena. Lempe ntšamo chë Bëngbe Bëtsábioye jadórama luarentše yomncá, chabe delante celoca, Jesucristo tojanma, chábioye jadórama tšabá chaoservema; pero chca tojanma más uámana soyënga jamëse, chë tmojóba bayëngaca bachnanga quem luarentše inmëtsama soyëngama.

²⁴ Er Cristo ndoñe tonjánamashëngo canÿe luarentše Bëngbe Bëtsá jadórama nÿe entšangbe pormánentše, ndaye luare nÿe batšatema jtsinÿanÿnayana ntšamo chë celoca luare Bëngbe Bëtsabe delante chábioye jadórama yomnana; ndayá cach celoye tojánamashëngo, Bëngbe Bëtsabe delante luaroye, bëngbiama jtseimpadánama.

²⁵ Chë bachnangbe más uámana amëndayana chë “más uámana luaroye” jamashënguana canÿe cada uata, bayëngbe buíñeca, ndoñe cachabe buíñeca, chca, ndayánaca jamama entšanga bacna soyënga tmojamama perdonánënga chamotsemnama. Pero Cristo chë luaroye celoca ndoñe tonjánamashëngo, chentšana jtéseboचना, y

chabe buiñe juabuáshanëse cachiñe jatóbanama, y ba soye cachcá chauétsemnana.

²⁶ Chca tojtsemnëse, Cristbiana manjanmëna jasúfriana y jóbanana ba soye, chë Bëngbe Bëtsá quem luare tojanma orscana. Pero ntšamo tojopasacá entsemna, mora chë quem luare jopochócama tempo yojtsobeco ora, Cristo canye y nyetsca tescama tojenonýinyé quem luarentša entšanga bacna soyënga jabuajuánama, chëngbiana jóbanëse, mo entšangbe bacna soyëngama canye tmojóba bayá, Bëngbe Bëtsábioye uatšëmbonacá.

²⁷ Cachcá, ntšamo nyetsca entšanga jtsamnana nye canye jóbanama, y chentšana Bëngbe Bëtsá chëngbiana jayanana chë imojëftsiyenëntscuana ntšamo tmojanmcá tšabá o ndoñe tšabá bétsemnana, y chëngaftaca jamana ntšamo chora tojajuabocá,

²⁸ cachcá, Crístnaca, nye canye chabe derecho vida jtsobomñama cachcá tojanonýá, chabe buiñe juabuáshanëse jóbanama, ba entšanga bacna soyëngama jáperdonama; y chentšana cachiñe yochjésabo, ndoñe bacna soyëngama entšanga jabáperdonama, ndayá chë cha cháuesabama tša tmobátmanënga jabátsebacama.

10

¹ Chë Moisesbe leyentša mandënga, ntšamo chë bachnanga yojánamnama Bëngbe Bëtsá jadórama tmojóba bayëngaca y inye soyëngaca, ndoñe ntsinýanýayana lempe chë Bëngbe Bëtsá chabe entšanga jatšatayana puerta tšabe soyënga, pero aíñe batšatema jtsinýanýayana ntšamo

chë soyënga yochtsemnama. Chíyeca chë mandënga, chë uátsëmbona soyëngaca y Bëngbe Bëtsábioye jadórama tmojóba bayëngaca, ndocna te ntjopódiana jamana chë Bëngbe Bëtsábioye jobéconama tmojtsebošënga, chca soyënga tmojtsamama cada uata nyets tempo, chënga ainaniñe corente chamotsetatšëmbuama chëngbe bacna soyëngama nyetsca tescama perdonánënga imojtsemnama.

² Er ndayá tcojtsamama Bëngbe Bëtsabiamama uátsëmbona soyëngaca y chábioye jëtschuayama tmojóba bayëngaca, entsanga Bëngbe Bëtsábioye adórayënga, chabe delante tsábënga jtsemnama matmënjanobenase, chënga chë bacna soyënga tmojanmama ainaniñe ngménaca ya ndoñe mamënjëtsemna, y matmëntsanaibaná soyënga amana chë tmojóba bayëngaca.

³ Pero juatšëmbonama entsanga bayënga tmojóba ora, josérviana entsanga bacna soyënga tmojamama cada uata chamuatenójuaboma;

⁴ er chë toronga y chivënga tmojóbanëngbe buíñeca ndoñe ntsopodénana entsángbioye bacna soyënga jabuajuánama.

⁵ Chíyeca, Cristo quem luaroye tojánabo ora, Bëngbe Bëtsábioye mëntsá tbojaniyana: Ndoñe tconjábošëna entsanga chacmátsëmbona soyënga, ni tmojobaye bayënga, pero aíñe tcojama atše canye entsacá chaitsemnama.

⁶ Ndoñe tsábá quecmátinÿana chë tmojóba y tmojajuinÿé bayënga, entsanga bacna soyëngama chacotsaperdonama.

⁷ As atše Běngbe Bětsá sěnjaniyana: “Běngbe Bětsá, muentše sěntsemna,

ntšamo aca icoboščá atše chaimama,

ntšamo acbe uabemana palabrénguiñe atšbiamama
endayancá, chě ndayá atše chjanmama ca.”

⁸ Natsana, Cristo tojánayana, Běngbe Bětsá ndoñe tonjánbošena, ni tšabá tbonjanínŷnana entšanga chamuátšěmbona soyěnga, ni Běngbe Bětsábioye jětschuayama tmojóba bayěnga, ni tmojóba ni tmojajuinŷé bayěnga, entšanga bacna soyěngama cha chaotsaperdonama ca, masque chěnga chě Běngbe Bětsábioye jadórama soyěngaca jamana, ntšamo leyíñe iuayancá ndayá chěnga jamama vojtsamna.

⁹ Y chentšana, Cristo Běngbe Bětsábioye tbojátaniyana: “Muentše sěnjabo, chě ntšamo aca icoboščá atše chaimama ca.” Chca, Cristo tojinŷanŷé chě jtsamana soyěnga tmojóba bayěngaca, tondaye yonduámama entšanga bacna soyěnga jabuajuánama, y entšangbe bacna soyěngama jóbaněse tojaninŷanŷé chě ntšamo Běngbe Bětsá yoboščá jtsamana, más iuámama chě inŷe soyěnga játamama.

¹⁰ Běngbe Bětsá tojama, běnga chabe entšanga y chabe delante tšábenga chamotsemnama, ntšamo Běngbe Bětsá yoboščá Jesucristo tojánmayeca, chabe derecho vida jtsobomñama cachcá jonŷayěse y entšangbe bacna soyěngama jóbaněse, canŷe y nŷetsca tescama.

¹¹ Judiěngbe nŷetsca bachnanga nŷets tempo ba soye altarentša natsanoica Běngbe Bětsá jtseservénana, y ba soye cachcá jtsamana tmojóba bayěngaca, pero chě soyěngaca

ndocna te ntjopódiana entšanga bacna soyënga jabuajuánama.

¹² Pero Jesucristo entšangbe bacna soyëngama tojanóbana ora, yojamna mo canÿe tmojóba bayacá, Bëngbe Bëtsá entšanga bacna soyëngama cháuaperdonama; nÿe canÿe y nÿetsca tescama chca tojanma, y chentšana Bëngbe Bëtsabe catšbioica tojtánótbema, canÿe uámana puestentše, jtsemándayama.

¹³ Chentše cha yobátmana, Bëngbe Bëtsá chabe obenánaca Cristbe uayayënga chabe cucuatšiñe chamoquedama yochjamëntscuana.

¹⁴ Er nÿe canÿe, entšangbe bacna soyëngama cruzoca jóbanëse, Jesucristo lempe tojama, entšanga chë Bëngbe Bëtsábenga jtsemnma chëmbonënga, chabe delante nÿetsca tescama tšabengcá chamotsemnma.

¹⁵ Y Uámana Espíritnaca, Bëngbe Bëtsabe uabenana palabrenguiñe šontsinÿanÿná chca ndegombre bëtsemnma, mëntšá tojánayana ora:

¹⁶ Ndayá entšangbiama chjama, canÿe tempo chentšana chanjašebuachená soye mëntšá entsemna ca, Bëngbe Utabná tojánayana:

Atše chanjama chënga chamotseboše jtmana ndayá chëngbe ainaniñe chaitsemánda soye, y chamotsejuabnama chë chëngbe juabniñe chaitsemánda soyama ca.

¹⁷ Y chentšana mëntšá tojánayana:

Ndocna te más quichátsjuabnaye chënga bacna soyënga tmojamama, y ntšamo atše stsebošcá contra soyënga chënga tmojamama ca.

18 Chcasna, Bëngbe Bëtsá nyetsca tescama entšanga bacna soyëngama tojaperdoná ora, ya ndoñe ntjátsiytana inye soyënga más játamama, mo bayënga cuafjobaycá, entšanga bacna soyëngama perdonánënga chamotsemnana.

Sontsamna Bëngbe Bëtsábioye jtobéconana

19 Y chca, Jesucristbeyeca catšátanga, Jesusbe buiñe tojanábuashanama y bëngbiana tojanóbanama, chábeñe jtsošbuáchiyëse, bënga montsobena, ton-dayama ntjatauatjca Bëngbe Bëtsabe delante jamashënguama.

20 Bënga montsobena jamashënguama chë tsëm benachëjana, Cristo bëngbiana tojamëjana; cha nda inétsama chë nyetsca tescama yomna tšabe vida chamotsebomnana. Mo chë quem luarentše chë bachnangbe más uámana amëndayacá, chë ujonýana entšëjuajana jamashënguana chë “más uámana ca” uabaina luaroye, Bëngbe Bëtsabe delante jtsemnana, cachcá, Cristo bëngbe bacna soyëngama mo entšacá tojanóbanayeca, bëngnaca montsobena Bëngbe Bëtsabe delante luaroye jamashënguama.

21 Bënga mondbomna canye bëts bachnangbe más uámana amëndayá, Bëngbe Bëtsabe entšángbeñe jtsemándayama, y cha endmëna Jesús.

22 Chíyeca, Bëngbe Bëtsá jasérviana ndegombre ainaniñe corente jtsebošëse, y chábeñe puerta jtsošbuáchiyëse, sontsamna Bëngbe Bëtsábioye jobéconana. Ntšamo chë bachnángbioye buiñeca tmojanabuešcacjca, Bëngbe Bëtsabe delante tšabengcá chamotsemnana cha jasérviana, cachcá, Cristbe buiñe juabuáshanëse y bëngbiana

jóbanëse, bënga ainaniñe corente montsetátšëmbo Bëngbe Bëtsá nÿetsca tescama bëngbe bacna soyëngama šojtsaperdonama. Y bënga bëjayeca uabainëngnaca mondmëna; chíyeca bënga jtsobenana Bëngbe Bëtsábioye chca jobéconana.

²³ Bënga šontsamna nÿets tempo Bëngbe Bëtsábeñe puerte jtsošbuáchiyana, y ndocna te nÿe ndayámna játajbanana entšángbeñe ichámuana, chë Bëngbe Bëtsábeñe jtsošbuáchiyëse bënga imobatmana soyënga cha yochjamama, er chë soyënga šojašebuachená cha, sempre jamana ntšamo tojayancá.

²⁴ Bënga šontsamna janguanguana ntšamo mu-atjobenaye añemo jenatšetayana, nÿetscanga jtsebobonshánana, y ntšamo tšabá yomncá jtsamana;

²⁵ pero ndoñe quešnátamna játajbanana, Bëngbe Bëtsábioye jadórana enefjuanana mo Crístbeñe ošbuáchiyënga quetsomñecá, ntšamo báseftanga imojtsamcá. Chamna, nÿetscanga añemo mochtsenatšetnaye Cristo nÿets tempo jtse servénama, y más mora, chë ndayá imojtsonÿama, Bëngbe Utabná yochjésabama ya yojtsobecuama montsetátšëmbo ora.

²⁶ Er chë ndegombre soyëngama tšabá tmojátatšëmbonentsana y chë soyënga tmojoyeuná chentšana, bacna soyënga jtsamëse tmojtsiyena, nÿe chca jamama tmojtseboše causa, muattsaboté ndayá Cristo bëngbiana tojanmcá, bëngbe bacna soyëngama cha tojanóbana ora, y ya tondaye nántsemna ntšamo Bëngbe Bëtsá bënga jtsaperdónama.

²⁷ Y chca, ndayá bënga muattsobena jobátmana

soye nántsemna nÿe chë Bëngbe Bëtsábiocana castigo, chë ndayama šojtsamna uatjana jtsebonnana; y nÿe jobátmana chë tempo, ndaye ora Bëngbe Bëtsá puerte etonaná chabe uayayënga bëtscá íñsheca yochtsapochócaye.

²⁸ Ndánaca chë Moisesbe leyama tojayana tondaye yondovalena ca, y útata o únganga chca tmojouena y aíñe cha chca tojayana ca chënga tmojayanëse, jtsemnana chë entšábioye jtsóbana, tondaye ntjalastemacá.

²⁹ Canÿa, nÿets ainánaca Bëngbe Bëtsabe Uaquiñábioye tbojtsaboté; y tojayana Cristbe buiñe, chë ndëmuanÿeye tojanábuashana bëngbiana tojanóbana ora, tondaye yonduámana ca, ndayá nÿe ndaye entšabe buiñcá ca, chë buiñe chë ndëmuanÿeye šojtsinÿanÿná ndayá Bëngbe Bëtsá tbojašebuachenacá bëngbiana jamama, y ndáyeca Bëngbe Bëtsá chabe entšanga šojábiana, cha jaserviama; chë entšá Uámana Espíritbioye tbojóyenguango, nda inétsama bënga tšabe soyënga chamotsebomnama; y canÿa chca amá, ¿tšëngaftanga ndoñe šmontsejuabná cha ibojtsomerecena Bëngbe Bëtsábiocana canÿe puerte más uabouana castigo, chë Moisesbe leyama tondaye yondovalena ca tojayanabiana?

³⁰ Bënga nÿetscanga mondëtatšëmbo Bëngbe Bëtsá mëntšá tojánayanama: “Atše chanjama chënga chamosufrima, ínÿenga chamosufrima tmojama causa; y chënga chanjácastigaye, ínÿengbioye bacá tmojaborlá causa ca.” Y mëntšánaca tojánayana: “Bëngbe Utabná chabe entšangbiana echanjayana ntšamo tmojëftsemcá tšabá o ndoñe

tšabá bétsemnama, y chěngaftaca echanjama ntšamo chora chaojajuabocá ca.”

³¹ ¡Tša uabouana, Běngbe Bětsá chě nŷets tempo ainabe cucuatšife joquédana, castiganá jtsemnama!

³² Pero ntšamo tempo yojamnama šmochtsenójuabnaye, chě ndegombre soyęga Jesucristbiana cabá chora šmonjanábuatmana ora, y chora tša jenojuérezana cmonjanotocá padecena soyęnguiñe, y chě causa tša šmojansufrí.

³³ Báseftanga tšęngaftanguentsęngbioye entsangbe delante tcmojanoyánguango, y ínŷęga tmojanma puerta chašmotsesufrínama; y ínŷęga tšęngaftanguentsęnga chca imojansufrinęngaftaca šmojanama, chęga jujabuáchama.

³⁴ Tšęngaftanga šmojánalastemana chě chęnguentšęga cárceloye imojanětámenęga; y oyejuayęga šmojanlesenciá ntšamo šmojanbomncá ínŷęga chacmotsabacama, er tšęngaftanga šmojátatšęmbona Běngbe Bětsábiocana más tšabe soyęga šmojtsebomnama, chě nŷetsca tescama šmochtsebomna soyęga.

³⁵ Chcasna, ndoñe šmatjajbaná ainaniñe bětscá añemo jtsebomnana, ni Běngbe Bětsábeñe sempre jtsobátmanana; er chca šmobatmánayeca, Běngbe Bětsá echanjama tšęngaftanga bětscá uacanana soyęga chábiocana chašmotsebomnama.

³⁶ Tšęngaftanga cmontsamna corente uantadęga jtsemnana, padecėniñe chašmojtsachnějuana ora, chca, ntšamo Běngbe Bětsá yoboščá tšęngaftanga chašmotsamama, y ndayá Běngbe Bětsá tojanašebuachenacá chašmóyęngacñama.

³⁷ Er Bëngbe Bëtsabe uabemana palabrenguine cha mentsá tojánayana:

Betsco, ndoñe bën, y chë jabama ibomná echanjabo.

Ndoñe bën quebochatóbema.

³⁸ Nye chë ndabiama atše chajjama atšbe bominyine tsabia chaotsemnama,

átšbeñe cha betsošbuáchema, cha ndegombre chë nyetsca tescama yomna tsabe vida echántsebomna;

pero uatjana causa, átšbeñe ošbuáchiyana tojtsajbanase, atše cháftaca ndoñe quichátoyeuaye ca —cha tojánayana.

³⁹ Pero bënga ndoñe quemásmëna chë uatjana causa Bëngbe Bëtsábeñe ošbuáchiyana tmojtsajbananga, y chca, nyetsca tescama pochocánënga jtsemnama imojtsajnënga; pero aíne mondmëna chë Bëngbe Bëtsábeñe ndegombre ošbuáchiyënga, y chca, chë atsebácanënga jtsemnama mochjashjáchënga.

11

Bëngbe Bëtsábeñe ošbuáchiyana jtsebomnana

¹ Ošbuáchiyana jtsebomnana endmëna corente jtsetatšëmbuana, ndayá tmojtsobatmancá ndegombre chca yochjopásama; endmëna ainaniñe corente jtsetatšëmbuana, ndayá bënga mora ndoñe tmontsonýacá ndegombre chca yomnama.

² Bëngbe Bëtsá tojánayana bëngbe bëts taitanga tsabá imojánama ca, chënga chábeñe imojtsošbuachéyeca.

3 Bënga, Bëngbe Bëtsábeñe mondošbuachéyeca, mondétatšëmbo cha quem luare y nyetsca luarënga tojanmama, chca chaotsemnama cha tojanmandá ora; chcasna, chë ndayá mora bënga jinýama imobencá, cha tojanma bënga ndoñe mondobena jinýama soyënguentsana.

4 Abel Bëngbe Bëtsábeñe yojanošbuachéyeca, oveshatëmënga chábioye tbojanátšëmbona, y chë soye Bëngbe Bëtsabiama más tšabá yojtsemna, chë ndayá Caín, chabe catšata, Bëngbe Bëtsá jëtschuayama tbojanátšëmbonama. Chíyeca, Bëngbe Bëtsá tojánayana Abel chabe bominyiñe tšabia yojtsemna ca, ndayá Abel chábioye jëtschuayama tojanmcá oyejuayá tojanóyëngacñeyeca. Ntšamo Abel Bëngbe Bëtsábeñe yojanošbuachecá, masque cha ya obaná yojtsemna, chë soye cabá bënga šontsabuatambá.

5 Enoc Bëngbe Bëtsábeñe puerte yojanošbuachéyeca, Bëngbe Bëtsá celoye tbojesanbétšeñe, ntjobancá. Chentšana ndocná tonjanobená cha jtsinýenana, Bëngbe Bëtsá tbojesanbétšeñe causa. Y Bëngbe Bëtsabe uabemana palabrënguiñe endayana, Bëngbe Bëtsá Enócaftaca oyejuayá canjamna ca, ntšamo jtsamëse yojoyenama, y chentšana celoye tbojtsanámbañe.

6 Pero Bëngbe Bëtsábeñe ntsošbuachiyá, ndoñe quenátópodena cha oyejuayá bëngaftaca jabemama, er chábioye jobéconamna, entšá jtsemnana jtsošbuáchiyana cha ndegombre bétsemnama, y cha inétsamama chë cha jtsabuata mama tša tmobošëngbiama bëtská tšabe

soyënga chamotsebomnama, mo chábiocana uacanana soyëngcá.

7 Bëngbe Bëtsá Noébioye tbojanbuayená uabouana soyënga yochjanopásama, cachora ndopodena jinÿama soyënga, y cha Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá y barquësha tojanapormá chabe pamíllanga játsebacama. Cha chca tojanma ora, ošbuáchiyana bómnyeyeca, cha tojaninÿanÿé entsanga tša bacna soyënga tmojanmama y chë causa castigánënga jtsemnana yojtsamnana. Chabe ošbuachiyánamnaca Noé tojánashjache Bëngbe Bëtsabe bominiñe tšabia jtsemnana, y chca entsá jashjáchana, nÿe Bëngbe Bëtsábeñe jtsošbuáchiyëse.

8 Bëngbe Bëtsá Abrahámbioye tbojanchembo, inÿe luaroye cháuama; Abraham Bëngbe Bëtsábeñe yojanošbuachéyeca, tojanma ntšamo Bëngbe Bëtsá tbojanmandacá, y tojánbocna chë luaroye jama, chë Bëngbe Bëtsá tbojanšbuachená jatsetayama luaroye, masque Abraham ndoñe yontsetátšëmbo ndëmoye yochjánama.

9 Bëngbe Bëtsábeñe yojanošbuachéyeca, yojobena mo inÿe luarocana ashjanganacá jtсийenana, cachabe luarentše ndoyená, chë Bëngbe Bëtsá tbojanšbuachená luarentše. Entšëjuaca pormana tambënguiñe yojoyena, cachcá ntšamo chë chábentšana básenga Isaac y Jacob ibojëftsiyencá; y chátnaca Abrahamcá ibojanobátmana jóyëngacñama ntšamo Bëngbe Bëtsá Abrahámbioye tbojanšbuachenacá.

10 Er Abraham corente uantadá yojanobátmana

chë canÿe luaroye celoca jamashënguama tempo; chë luare inamna canÿe bëts pueblo, puerte tsabe ucuatjoniñe pormana pueblo, canÿe luare chë ndayentsama Bëngbe Bëtsá tojanjuabó ntšamo chaotsemnama, y cachabe pormana luare inamna.

11 Sara, Bëngbe Bëtsábeñe yojanošbuachéyeca, Bëngbe Bëtsá tojanma cha canÿe šešona chabotsebomnama, masque chora ya bëtsanánějema yojtsemna, šešona jtsebomnama. Bëngbe Bëtsá chca tojanma, er Sara corente yojanjuabná, cha chë canÿe šešona yochtsanbomnama tbojanšbuachená cha, nÿets tempo ntšamo tojayancá amá yojamna ca.

12 Y chca, quem entsá Abraham, chë šešonga jtsabamnama ya ndobenábentšana, ba básenga tmojanonÿná, tša mallajta mo chë celoca estrellëngcá, y tša chëftanga mo chë mar béjayoca chëñyañentša cascajca, ndocná jacúntama ntjobenayana.

13 Nÿetsca quem entsanga imojëftsiyena jtsamëse ntšamo chëngbe ošbuáchiyana yojamncá, y chca tmojanóbana, masque cabá ndoñe tmonjanóyëngacñe chë Bëngbe Bëtsá tojanašebuachená soyënga. Pero chëngbe ošbuachiyánama corente imojtsetátšëmbo, Bëngbe Bëtsá chentšana baytese ntšamo tojanašebuachenacá yochjánatsatayama y chë soyënga ndegombre yochtsemnama, y chama oyejuayënga chënga imojtsemna. Chënga tmojánayana quem luarentše chënga imojoyena mo cachëngbe luarentše ndoyenëngcá, y quem luarëjana mo nÿe achñëjuanëngcá ca.

14 Y chca tmojtsichámēngna, puerte jtsinŷanŷnayana chēnga tša imojtseboše inŷe luaroca joyéanama, canŷe luare cachēngbiana.

15 Chēnga nŷe chē ndayentšana tmojěftsanbocna luarama manjánjuabnase, matmēnjanobená tšabá cachoye jesshéconama.

16 Pero chēngna canŷe más tšabe luare immaboše, canŷe luare celoca. Chíyeca Bēngbe Bětsá ndoñe yonjanēuatja, chēngbe Bětsá ca chēnga chamotsechembuanama, er celoca canŷe bēts luare, mo canŷe bēts pueblécá chēngbiana tojanprontá.

17 Bēngbe Bětsá Abrahámbyoye jinŷama, ndegombre aīñe o ndoñe Bēngbe Bětsábeñe tayojtsanošbuachema, tbojanmandá chabe uaquiñá Isaac chabuánatse jóbama, chábioye jětschuayama, ntšamo Abraham chē tojóba bayēngaftaca jamama yojanamancá. Cha Bēngbe Bětsábeñe yojanošbuachéyeca, yojtseprontana chē nŷe canŷe uaquiñá ibnabomná jóbama, Bēngbe Bětsábioye jětschuayama, masque Bēngbe Bětsá mēntšá tbojanšbuachená:

18 “Chē ácbentšana entšanga nŷe Isaacbiajana mochanjabo ca.”

19 Abraham corente yojanjuabná y yojátatsēmo, Bēngbe Bětsá ndegombre obenana bomná bétsemnama, chē obanēnga chámuatayenama jamama. Chíyeca, Bēngbe Bětsá Abrahámbyoye tbojtsanauyaná Isaac jóbama ora, yojamna mo Abraham obanēnguentšana chábioye cuaftoyēngacñécá. Y chca, ntšamo Isaácaftaca tojanopasacá, batšá yojtsinŷanŷnaye ntšamo

Jesucrísoftaca yochjanopasacá.

²⁰ Isaac Bëngbe Bëtsábeñe yojanošbuachéyeca, Bëngbe Bëtsábioye tbojanimpadá chabe uaquiñátbiamá, Jacob y Esaú, bëtscá tšabe bendicionënga chabotsebomnama, chë joshjanguama tempënga ora.

²¹ Jacob Bëngbe Bëtsábeñe yojanošbuachéyeca, ya jóbanama ora, tbojanimpadá cada ona chë Josebe básengbiamá, Bëngbe Bëtsá chaoma bëtscá tšabe bendicionënga chamotsebomnama. Cha chca tojanma, jotsejbénase Bëngbe Bëtsábioye jadórama, y chabe jatjonëfjiñe tsbanánoca jojuáchase.

²² José Bëngbe Bëtsábeñe yojanošbuachéyeca, ya jóbanama ora, tojánayana más chcoye chë Israeloca entšanga Egiptó luarentšana mochjëftsanbocna ca, y tojëftsanmandá ndayá jamana chabe óbana cuérpoca.

²³ Moisesbe bëtšétsata Bëngbe Bëtsábeñe ibojanošbuachéyeca, cha tojanonýná ora, unga shinýentscuana cha tmojtsaniytëme, er chata tbojáninýe cha canýe botamana básetema bétsemnama, y ndoñe tbonjanëuatjaná chë reybe mandama, chë nýetsca judiëngbe basetëmënga boyabásetemënga jtsëbáyana.

²⁴ Moisés Bëngbe Bëtsábeñe yojanošbuachéyeca, ya bëtscá yojtsemna ora, ndoñe tonjánbošena chë Egiptoca reybe bembëbe uaquiñacá chamotsábuatmama.

²⁵ Chamna, tojánbošena cha jasúfriama ínýenga chamotsamama, cánýiñe chë Bëngbe Bëtsabe entšángaftaca, y ndoñe nýe baseftayté tšabá

jatsmēnana, bacna soyēnga jtsamēse, ntšamo cachá tojtsejuabnacá, n̄ye cachá tšabá jtsomñama.

²⁶ Chamna, cha yojanjuabná, chē padecena soyēnguiñe jasúfriana ntšamo Cristo tojan-sufricá, más tšabá yojamna chē Egiptoca uámana soyēngama, er cha Bēngbe Bētsábeñe jtsošbuáchiyēse chábeñe yojanobátmana, ba tšabe soyēnga mo can̄ye uacanana soycá cha ibochjanatsetayama.

²⁷ Bēngbe Bētsábeñe yojanošbuachéyeca, Moisés Egiptocana tojéftsanbocna, chē luarentša rey cháftaca chábuetnama ntjatauatjca. Cha ainaniñe n̄yets tempo añemo yojtsebomna, y chca yojánin̄yna mo chē ndocná jin̄yama tondobenacá, Bēngbe Bētsábioye cuaftson̄yacá.

²⁸ Bēngbe Bētsábeñe yojanošbuachéyeca, ntšamo Bēngbe Bētsá tbojanmandacá, Moisés chē judiēnga tojanabuayená Bashco fiesta jamama, y chē Israeloca entšángaftaca yebnēngoye amashjuaniñe buiñeca tojanbuéscacja, chca, chē ángel obanayá, chē Israeloca pamíllangbeñe Egiptoca chē mayor uaquiñēnga ndocá chaondámama.

²⁹ Moisés y Israeloca entšanga Bēngbe Bētsábeñe imojanošbuachéyeca, chē “Buángana ca” uabaina mar bejayējana tmojánenachnēngo, mo chiñe bo-jojo fshantse cuaftsomñcá; chentšana, chē Egiptoca entšanga cachcá jamama tmojánbošena ora, n̄yetscanga chiyiñe tojtsanatajo.

³⁰ Israeloca entšanga Bēngbe Bētsábeñe imojanošbuachéyeca, chē Jericó bēts pueblentša tapiēsēnga shēconana can̄ysēfta tentscuama chēnga imojánajnentšana, chēsēnga yojtsáshajaye.

³¹ Rahab, chë pueblentša bacna vida bomna shembása, Bëngbe Bëtsábeñe yojanošbuachéyeca, ndoñe tonjanóbana chë ínÿengaftaca, chë bëts pueblentše oyenënga, chë ntšamo Bëngbe Bëtsá tojanmandacá ndoñe tmonjanmënga; y ndoñe tonjanóbana, er chë Israeloca entšanguentšana ichmónënga tšabá tojanëbuaja, chë jarrepárama tmojánanga ntšámose chë luarentše oyenënga jáyënjanama jobenayama.

³² Atše sëntsobena bangbiamá más jóyebuambayama, Bëngbe Bëtsábeñe ošbuáchiyëngbiamá, pero luare šattsëshbe chcangbiamá jóyebuambayama, mo Gedeoncá, Barac, Sansón, Jefté, David, Samuel y Bëngbe Bëtsabe juabna oyebuambnayëngcá.

³³ Chënga Bëngbe Bëtsábeñe imojanošbuachéyeca ínÿengbe mandadëngbe entšángbioye tmojanayëñaná, bëtscá imojánama nÿetsca entšángaftaca ntšamo tšabá yomncá jtsamama y nÿetscanga cachcá chamotsámanama, ndayá Bëngbe Bëtsá chënga tojanašebuachenacá tmojanóyëngacñe; y Bëngbe Bëtsá tojanma chënga leóngaca imojtsemna ora, chënga chamuatenáyebengoma, chentšana báseftangbioye ndocá chamondámama.

³⁴ Ošbuáchiyana bómnyayeca, Bëngbe Bëtsá tojanma lempe chaotsefsanama, chëngbioye iñeshiñe tmojanacjá ora, chënga ndocá chamondëpasama; tmojanotsbocá espadëjaca jobanámentšana; ya tondaye añemo béntsebomna ora, Bëngbe Bëtsá tojanma bëts obenana y puerte añemo chamotsebomnama; tmojánashjache bëts obenana jtsebomnama ínÿenga jáyënjanama,

chëngaftaca imojtsentsjaná ora; y tmojanobená inÿe mandadënga y chëngbe soldadënga jáyënjanama, chamotsachetama jamëse.

³⁵ Ošbuáchiyana bómnayeca, básefta shembásenga chëngbe óbana pamíllangbioye cachiñe ainënga tmojtananÿe, chënga ainënga chamotsatsmënama Bëngbe Bëtsá tojanma ora.

Ošbuáchiyana bómnayeca, ínÿenga tmojanma básefta ošbuáchiyënga, puerta chamosufrima, y jobanámnaca; er chënga más tmojánbošena jashjáchana chë nÿetsca tescama yomna tšabe vida jtsebomnana, y ndoñe nÿe chë jótsbocana batšatema más vida jtsebomnana.

³⁶ Ošbuáchiyana bómnayeca, ínÿenga corente tmojansufrí, ínÿenga chëngbioye tmojanoyáanguango ora y tmojanatsetšená ora; y ínÿenga tmojansufrí y cárceloye cadenëjuangaca utámenënga joquédamnaca.

³⁷ Inÿengbioye ndëtsbéngaca tmojt-sanatëchënganja, serruchëshaca tmojt-sanëjátcacaye, espadëjaca tmojtsanëbaye. Inÿenga imojánajna cánÿentšana ínÿecnoye nÿe oveshá y chivëbe bobácheca uichëtjonënga, ujabótënga, ainana tsetšanënga, y ínÿengbeyeca mocá borlánënga.

³⁸ Chë nÿe quem luarama enójuabnayënga ndoñe monjanomerecena chënga mëngaftaca jtsiyenama, chënga chë vida imojábomna cánÿentšana ínÿecnoye aniñe, entšanga ndoyena luarënguenache, tjañenache, fshantsiñe atëbëfjniñe y cuevëshënguñe.

³⁹ Nÿetsca quem entšanga, ndëmuanÿengbiana

muentše tmonjoyebuambá, Běngbe Bětsá tšabá chěngbiamama tojánayana, ošbuáchiyana imojánbomnaca; pero ni canya chěnguentšá tonjanóyengacñe, ndayá Běngbe Bětsá chěngbe entsanga jatšatayama tojanašebuachenacá, nyetsca tescama jtsebomnama.

⁴⁰ Běngbe Bětsá, běngbeñe jtsejuabnayese, tojanjuabó canye más tšabe soye běngbiamama jamama, chca, Běngbe Bětsá canye ora jamama, běnga nyetscanga, chěnga y běnga chamotsemnama lempe ntšamo Běngbe Bětsá yobošcá, ntšamo Běngbe Bětsá tojanašebuachenacá jóyěngacñese.

12

Běnga mochtsejuabnaye ndayá Jesús tojanmama

¹ Chíyeca, běnga mochtsejuabnaye ba entsangbiamama, chě běngbiamama más natsana imojaniyeněnga, ndēmuanyěnga puerte tšabá běnga jtsinyanayana ntšamo ndegombre yomnana Běngbe Bětsábeñe ošbuáchiyana jtsebomnana, mo chěnga ndayá běnga tmojtsamama cuaftsonyěngcá. Chcasna, mo chě tmochamaněngcá, ín्यengaftaca jeněyějanama, chě jashjanguama tojtsemna luaroye natsana jashjanguama, chěnga jotjajuamna, chě chorscama nduaserverna entsáyá jtsenátsejcana, y lempe ndayá tojtsama más uenana chamotjajuama soyěngnaca jtsenójacana; běngnaca cachcá, ndoñe matjaleséncia běnga Crístbioye ndoñe tšabá ndětsoservénama, ni chě bacna soyěnga jamama juabněnga, chě běngbioye paselo jáyějanama juabněnga cachcá chamotsamama. Chamna, šontsamna sempre

Bëngbe Bëtsá jtseservénana, puerte uantadënga jtsemnëse masque padecena soyënguiñe tmoyena, bënga chamobená chë trabajo jamama, chë ndayama Bëngbe Bëtsá šojáchembo.

² Jesusbiana mochtsejuabnaye, nda šuebënatsana bënga ošbuáchiyana chamotsebomnama, y šuinÿanÿná ntšamo nÿets tempo nÿetsca soyënguiñe Bëngbe Bëtsábeñe jtsošbuáchiyama. Cha chë cruzoca jóbanama sufrínana lempe tojanoboyá, er cha yojanobátmana chë chentšana yochtsanbomna bëts oyejuayánama; y yojanjuabná, chë más bacá uamana entsangcá jóbanana, chabiana ndoñe canÿe uámana soye yonjamna ca; y chentšana chë uámana puestentše tojtanoítbema, Bëngbe Bëtsabe catsbioica, jtsemándayama.

³ Chíyeca, šmochtsejuabnaye ntšamo Jesús Bëngbe Bëtsábeñe jtsobátmanëse, puerte uantado yojamnama, chë bacna soye amënga corente chabe contra imojtsemna ora. Chca chábeñe šmochtsejuabnaye, tšëngaftanga Cristbiana oservéniñe ndoñe chacmondëumantšema, ni ainaniñe añemo jtsebomnana ndoñe chašmondájbanama.

⁴ Tšëngaftanga padecena soyënguiñe šmojachnëngo, entsanga bacna soyënga imojtsama causa, pero mëntscoñama ndoñe cmontsamna jóbanama, Cristbe soyëngama enojuerzániñe;

⁵ y tcmojtsébnëtjomba ndayá Bëngbe Bëtsá tšëngaftangbioye, chabe básenga quetsomñecá tcmojábuayenama. Chë Bëngbe Bëtsabe uabemana palabrënguiñe mëntsá endayana:

Atsbe uaquiñá, Bëngbe Utabná aca jábuayenama tojtseboše ora, aca jasúfriase y padecena soyënga jauántase,
 chora ndoñe catjátsjuabnaye chiñe mo canye nduámana soye cuaftsemncá;
 y cha chacmojuácacana ora, ndoñe cattsajbaná ainaniñe añemo jtsebomnana.

⁶ Er Bëngbe Utabná jábuayenana nda cha tbobobonshanábioye,
 y jacastígana chë mo chabe uaquiñacá tbojofjábioye ca –chiñe endayana.

⁷ Padecena soyënguiñe chašmojtseufrina ora, šmochtsejuabnaye chë soye yojtsemna tšëngaftangbioye jábuayenama, y chca, Bëngbe Bëtsá tšëngaftangftaca jtsamana mo chabe básenga quetsomñecá. ¿Nderado nántsemna canye uaquiñá, y chábioye chabe taitá ndocna te buanjuácacana, más tšabá chaotsamama?

⁸ Nderado Bëngbe Bëtsá tšëngaftanga ndoñe tcmonejabuayená, ntšamo nyetsca chabe básengaftaca cha endbetsamcá, as tšëngaftanga ndoñe ntsemnana ndegombre chabe básenga.

⁹ Y bënga básenga monjamna ora, bëngbe bëtsétsanga quem luarentše monjanamana bënga jácastigana, y bënga chëngbioye ndoñe stëtsoye ntjaquédana. Y mora, bënga más šontsamna, jtsobedecénana y más bëts respeto jtsebomnana celoca Bëngbe Taitabiamana, nda tojama entsanga espíritu chamotsebomnana, y chca, bënga tšabe vida chamotsebomnana.

¹⁰ Bëngbe bëtsétsanga quem luarentše, nye básefta tescama, bënga jëftsabuayiynayana, y chca jamana chënga tšabá tojtsinýana ora; pero Bëngbe Bëtsá

bënga šojtsabuayiyná ora, sempre chca jtsamana bëngbe tšabiamama, bënga chabe entsanga jábiamama, cachacá puerte tšábenga, ntšamo cha nyets tempo yomncá.

¹¹ Sempre bënga ndaye castigo tmojtsebmna ora, chora bënga chama ndoñe oyejuayënga ntsemnana, pero aïñe cochtsetšenánënga. Pero bënga chë castigüentsana tmojuatsjinÿe ndayá Bëngbe Bëtsá chë sóyeca tbojtsabuayiynacá, as chentšana jóbocnana natjëmbana oyenana, nyetsca soyënguiñe ntšamo tšabá yomncá jtsamëse.

Bëngbe Bëtsábioye jtsabotena, entsangbiama ndoñe tšabá ntsemnana.

¹² Mo nda puerte uamëntšnayacá, jatrabájama tondaye añemo ntjtsebmncá, tsátšena buacu-atšëngaca y puerte uamëntšena ntsamiasšëngaca, tšëngaftangbentše báseftanga ya uamëntšnayënga šmojtsemna Bëngbe Utabnabiamama trabájayiñe, y ainaniñe ndoñe añemo šmontsebmna. Cachiñe bëts añemo šmochtishache, y Bëngbe Bëtsabe obenana cachiñe šmochtsatsbmna.

¹³ Mo chë canÿe benache tšabá y ndericho chaotsemnama tmojtsamëngcá, chca, chë coshetënga chiñe jama chamotsobenama y más tšabá jtsatanama chamuatatsjínÿama, y chë benachentsana ndoñe chamondëtsebocanama; cachcá tšëngaftanga, chë bëtsacá ošbuáchiyana y Cristo jasérviamama corente añemo šmobomnënga, chë nÿe batšatema ošbuáchiyana y chca jatrabájama nÿe tondaye añemo ndbmomnënga šmochjújabuache; chë soye šmochjama, ntšamo Cristo tšabá jasérviamama yomncá jinÿanÿiyëse, y

ntjalesenciá ndocna soye chaotsama chë tšabe benachentsana tšëngaftanga chašmotsojuánañama.

¹⁴ Lempe ntšamo chašmojobenacá šmochjama nyetscángaftaca natjěmbana jtsiyenama, y ntšamo Běngbe Bětsabe entsanga mondbetsamcá jtsaměse chašmotsiyenama, cha jtseservéněse; er chca ntjamcá, canya ndoñe ntsobenana Běngbe Utabnábioye jinýama.

¹⁵ Yejuana šmochtsantješna, ndocná Crístbeñe ošbuáchiyana chaondětsajbanama, y chca, chë Běngbe Bětsá chabe entšángbioye yochjatsataye tšabe soyěnga chěnga ndoñe chamondashjache. Smochtsantješna, tšëngaftanguentše ndocná chaondětsemna, mo canye untja tbětějcá, chë chcaja sayěngbioye jásocayana, nda chaotsama, ínýenga natjěmbana ainana ndoñe chamondětsebomnama y bacna soyěnga jtsaměse chamotsiyenama.

¹⁶ Yejuana šmochtsantješna ndocná tšëngaftanguentše shembása o boyabásaftaca bacna soye amá chaondětsemnama, ni canya ndabiama Běngbe Bětsabe soyěnga tondaye chaondětsámana. Esaú chca tojanma, chë lempe yochjanashjachcá, mayor uaquiñá bětsemnama, chabe uabentsábioye canye šcnena sanama tbojtaname ora.

¹⁷ Y tšëngaftanga šmondětatsěmbo, chca tojanopasá chentsana, Esaú tojánbošena chabe taitá Běngbe Bětsábioye chaboimpadama, chabiama tšabe bendicioněnga chaomama, chë mayor uaquiñá bětsemnama yojanobena jtsebomnama soyěnga; pero chora chabe taitá ndoñe tbonjanoyeuná, er masque Esaú chora

juabna tojanrocá, cha ndoñe tonjanobená ntšamo yojtsopasancá jëtsjandmanana. Masque cha tša tojánbošena, shëchbuíyeca chabe taitábioye jaimpádase, ya ndoñe yontsopodena ntšamo tojanopasacá jëtsjandmanana.

18 Tšëngaftanga ndoñe chešmatobeconá, mo chë entšanga Israeloca Sinaí ca uabaina tjoye tmojanobeconacá, ndayá chënga imojobena jabojuama, y íñesheca yojtsángbototjuana, tondaye binÿniñe luare, tša ibetiñe y puerte jabuache binÿiëngaca;

19 ni chešmatuena chëngcá, canÿe trompetëfjua uajatëtanana, ni Bëngbe Bëtsabe oyebuambnayana. Chë oyebuambnayana tmojanuenënga, imojtseimpadana ndoñe más chëngbioye chaondëtsóyebuambnama.

20 Chca tmojanma, jauántama ndoñe tmonjanobená causa, ntšamo Bëngbe Bëtsá tojanamëndacá: “Nda quem tjoca chaojoyená, masque canÿe bayá chaotsomñe, entsemna chana ndëtsbéngaca chamotsatëchënjanga jtsóbama ca.”

21 Ndegombre, ntšamo tmojaninÿcá tša uabouana yojtsemna, cach Moisésnaca mëntšá tojánayana: “Tša šontsengmëmna auatjananá sëntsemna causa ca.”

22 Pero tšëngaftanga Bëngbe Bëtsábioye šmojobeconá, y chca endmëna mo tšëngaftanga canÿe Sión ca uabaina tjoye celoca cuafjobeconacá, chë Bëngbe Bëtsá nÿets tempo vida bomnabe bëts puebloye, mo celoca Jerusalén cuenta; y ba uaranga angelëngbioye šmojobeconá, cánÿiñe oyejuayënga

enefjuanënga imojtsemnëngbioye, Bëngbe Bëtsá jtsatschuanayama.

23 Endmëna mo tsëngaftanga chë Bëngbe Bëtsabe entsángbioye cuaŋjobeconangcá, chentše enefjuanënga mo Bëngbe Bëtsabe basengcá, chënga ndayá chë Taitá tojašebuachenacá jójyëngacñama, ndëmuanÿenga Bëngbe Bëtsá chabe librësañe tojúbiamama. Tsëngaftanga šmojobeconá Bëngbe Bëtsábioye, ntšamo nÿetsca entsanga tmojamcá tsabá o ndoñe tsabá bëtsemnama yochjayanábioye. Endmëna mo tsëngaftanga cuaŋjobeconacá, chë entsanga mora ya obanënga y ntšamo tsabá yomncá jtsamëse imojëftsiyenëngbe espiritëngbioye, chë entsanga ndëmuanÿengbiamama Bëngbe Bëtsá tojanma chamotsemnama lempe ntšamo chabe entsangbiamama yojanjuabnacá, chca, cháftaca sempre vida jëftsebomnama.

24 Tsëngaftanga Jesúsbioye šmojobeconá, chë jóbanëse, entsanga Bëngbe Bëtsáftaca mo canÿacá chamotsemnama tojanmá, ntšamo Bëngbe Bëtsabe tsëm trato yojamncá; y endmëna mo chë bëngbiamama cha tojanóbana ora tojanábuashana buiñoye tsëngaftanga cuaŋjobeconacá; chca tojanábuashana, bëngbioye Bëngbe Bëtsabe delante mo tsabengcá jábiamama, mo ntšamo entsángbeñe buiñe jabuëscacjama chë bachnanga imojuamancá. Caín chabe catsata Abélbioye tbojanóba ora, yojamna mo chë Abelbe uabuáshanana buiñe Bëngbe Bëtsábioye cuaftseimpadancá, chë bacna soyama castigo chaotsemnama; pero Jesucristbe buiñe ndoñe chca ntsamana, ndayá chíyeca bënga más tsabe soyënga jashjáchana; Jesusbe buiñeca,

bënga montsobena atsebácanënga jtsemnama.

²⁵ Cuedado šmochtsebomna, bëngbioye tojtsoyebuambná ora cha joyeunayama. Chë Israe-loca entsanga ndoñe tmonjánbošena Bëngbe Bëtsá joyeunayama, chë Sinaí tjoca quem luarentše tojanabuayená ora; chëngbioye cha tojanacastigá. Y mora más, Bëngbe Bëtsá, chë celocana bënga abuayiynayá, ndoñe cachcá ndëcastigánënga quešochátabashejuana, ntšamo cha šojtsëtsëtsnacá ndoñe tmontseyeunanëse.

²⁶ Bëngbe Bëtsá Sinaí tjoca chë entsángbioye tojanoyebuambá ora, chabe oyeambuambnayanaca tojanma quem luare chauangmémanama, pero mora cha chabe uabemana palabrënguiñe tojašebuachená: “Atše cachiñe chanjatsma chauangmémanama, ndoñe nÿe quem luare, sinó celócnaca ca.”

²⁷ Bëngbe Bëtsá “cachiñe ca” tojánayana ora, chë sóyeca yojtsichamo, chë ndayté lempe chaongmémanama cha cachiñe yochjama ora, chë quem luarentše tmojama soyënga y chë jatrócama yopodena soyënga yochtsejuána ca, chca, nÿe chë nÿetsca tescama yomna soyënga y ndoñe jatrócama soyënga chaoquedama.

²⁸ Chcasna, Bëngbe Bëtsabe amëndayoca, chë cha yochjama bënga chamuamashënguama luare, yomna cachcá nÿetsca tescama y ndocna te ntjotrócana. Bëngbe Bëtsá chama mochjëtschuaye, y ntšamo cha tšabá tbojtsinÿancá mochtsadorana, chabiamá bëts respeto jtsebomnëse, y nÿetscangbiamá más bëtsá cha yomnama jtsejuabnayëse.

²⁹ Er Bëngbe Bëtsá puerta etonaná chë chabi-

ama nduauenanënga jabuache echanjácastigaye, y chca, cha jtsemnana mo canye íñeshe lempe jtse-pochocamcá.

13

Ntšamo jtsiyenama, Bëngbe Bëtsá oyejuayá bëngaftaca chaotsemnana

¹ Sempre nyetscanga šmochtsenbobonshana, Jesucristbeyeca catšátanga quetsomñecá.

² Sempre tšabá chë tšëngaftangbe yebnoye inye luarëngocana tmojáshjajnënga šmochjúbuaja, er chca jamëse, ntsetatšëmbcá báseftangna angelënga chëngbe yebnentše tmojanëbuaja.

³ Chë utámenëngbiana sempre šmochtsenójuabnaye, mo tšëngaftánagnaca chëngaftaca utámenënga cuaftsemncá. Chë ínÿenga tmojtsama chamotsesufrinëngbiana šmochtsenójuabnaye, er tšëngaftánagnaca nderado cachcá šmatjatspása.

⁴ Boyabása y shembása tbojanobouamá ora, ntšamo tbojanensbuachenacá nyetscanga chamot-serrespetana; y chë útata chabotsama nÿe ndayá y nÿe ntšamo Bëngbe Bëtsá bouamnátbioye tojanamëndacá, er Bëngbe Bëtsá echanjácastigaye chë shembása o boyabásaftaca bacna soye amënga, y chë shema o boyábioye ínÿaftaca ingñayëngnaca.

⁵ Ndoñe šmattsiyena jtsejuabnayëse nÿe malla-jta crocénana jëftsebomnana. Nÿe chë šmobomna soyëngaca oyejuayënga šmochtsomñe, er Bëngbe Bëtsá tojánayana: “Ndocna te cachcá quebochatonÿaye, ni canÿa quebocháiseboshjona ca.”

6 Y chca, bënga montsobena corente añémoca jayanama:

Bëngbe Utabná endmëna nda atše
sonduájabuachana; tondayama
quichátauatja.

¿Ndayá canÿe entšá nanjobenaye átšeftaca jamama ca?

7 Tšëngaftangbe amëndayëngbiana,
chë Bëngbe Bëtsabe buayenana
soyënga tcmojábuatambangbiana, sempre
šmochtsenójuabnaye. Sempre šmochtsenójuabnaye
chë ntšamo chënga imojaniyentšana
tojanóbocna tšabe soyëngama, y šmochtsiyena
jtsamëse ntšamo chënga imojanamcá,
Jesucristbeñe ošbuáchiyënga bëtsemnama.

8 Jesucristo cachá nÿets tempo iuëtsemna, tempo, mora y nÿetsca tescama.

9 Ndoñe šmatjaleséncia ínÿenga chamot-samama tšëngaftanga chë benachentšana chašmotsojuánañama, ndayá chënga tmojtsabuátambama, y chë Cristo tojánabuatambama contra soyëngaca. Más tšabá endmëna bënga ainaniñe añemo jtsebomnana, Bëngbe Bëtsá tšabe juabna bëngbiana yobómnayeca, y ndoñe chë sanama, chë ndayá aíñe o ndoñe šontsamna jtsesayana soyëngama mandënga tcojtsamëse. Chca mandënga ndocna te chë Israeloca entšangbiana tempo tonjanoservé.

10 Bënga chë Jesucristbeñe mondošbuáchenga, canÿe soye mondbomna mo chë Bëngbe Bëtsábioye jëtschuayama altaroca juinÿena soycá, bacna soyëngama perdonánënga jtsemnama. Bënga mondbomna chë Jesucristo bëngbiana tojanma

soye, cruzoca tojanóbana ora, bəngbe bacna soyəngama; y chē n̄ye tmojóba bayəngaca soyənga tmojtsama bachnanga ndoñe ntsebomnana, chē Cristo tojanóbana ora, ndayá tojanmentšana tojanóbocna tšabe soyənga.

¹¹ Er chē judiəngbe más uámana bachnangbe aməndayá, chē tmojóba bayəngbe buiñe chē “más uámana ca” uabaina luaroye juabuyambana, Bəngbe Bətsá entšangbe bacna soyəngama cháuaperdonama, y chē bayəngbe cuerpənga jtsejuin̄iyana entšanga tmoyena luarentšana chaboca.

¹² Cachcá, Jesúsna tojansufrí y tojanóbana bəts pueblentšana chaboca, chabe buiñe tojanábuashana ora jóbanəse, entšanga Bəngbe Bətsábenga chamotsemnana, y chabe delante mo tšabengcá chamotsemnana.

¹³ Chíyeca bənga šontsamna Jesúsbioye jobéconana, nda entšanga tmojtsanaboté y bəts pueblentšana chaboca tojanóbana. Cha mochjuasto, y ntšamo cha tojansufricá bəngnaca mochjasúfria.

¹⁴ Er quem luarentše bənga ndoñe quemátsbomna can̄ye bəts pueblo bəngbiama, n̄yets tempo chauesomñe bəts pueblo, ndayá bəngna tša mondboše y puerta mondobátmana bənga joyənanama chē celoca yochtsemna Bəngbe Bətsabe bəts pueblentše.

¹⁵ Chíyeca, šontsamna sempre Bəngbe Bətsábioye jtsatschuanayana, Jesucristbiajana. Bəngbe Bətsá chca tmojtsadorana ora, jtsemnana mo chábioye jətschuayama can̄ye soye cuafjuatšəmboncá. Chcasna, jtsóyebuambnayəse cha mochtsadorana.

16 Sempre ntšamo tšabá yomncá šmochtsama, y chë šmобomncá inyengbiámnaca chaotsemna. Chca šmochtsama, er chca tcojama ora, Bëngbe Bëtsá oyejuayá jtsejuabnayana chca chabiama tcojama ca, y jtsinynana bënga Bëngbe Bëtsá imojt-satschuanama, ndayá cha tojamama.

17 Sempre šmochtsama ntšamo chë tšëngaftanga ošbuachiyëngcá enefjuanëngbeñe amëndayënga tmojayancá, y sempre šmochtsiyena jtsamëse nye ntšamo chënga tmojtsebošcá. Chënga sempre tšëngaftangbioye jtsanynana, tšëngaftangbe tšabiama, ntšamo cmojánanynenama Bëngbe Bëtsábioye jojuama yojtsamnana chënga jtsetatšëmbëse. Jtsayaunanëse, šmochjama chënga chëngbe trabajo oyejuayánaca y ndoñe ngménaca chamotsamama, er ndoñe chca šmonjamëse, chë trabajo tšëngaftangbe tšabiama ndoñe nántsemna.

18 Bëngbe Bëtsá bëngbiama šmochtseimpadana, er bënga ainaniñe corente fsëndëtatšëmbo tšabá tifjamama, y tša fsëntseboše jtsiyenana ntšamo tšabá yomncá lempe jtsamëse.

19 Tšëngaftanga bëtscá cbontsaimpadana, Bëngbe Bëtsá chašmoimpadama, atše chašolesenciama tšëngaftangaftaca cachiñe jtsatsmënana.

Bëngbe Bëtsábioye chëngbiama jaimpádama y chënga jacheuayama

20 Atše, Bëngbe Bëtsá sëntseimpadana, cha chë nda endbétsama bënga natjëmbana chamotsiyenama, y nda tojanma Bëngbe Utabná Jesús cháuatayenama, nda bënga šondánynena mo oveshëngbe tšabe abuajënyácá; y Bëngbe Bëtsá chca tojanma, Jesús, chabe buiñe juabuáshanëse

tojanóbanayeca, chca, entšanga jinjänyiyama ndegombre bétsemnama ntšamo Bëngbe Bëtsá chabe entšangbiama tojanašebuachenacá nÿetsca tescama jamama.

²¹ Cha sëntseimpadana chaoma tšëngaftanga chašmotsebmnama nÿetsca tšabe soyënga ntšamo cmojtsëjabotcá, chca, lempe ntšamo cha yobošcá tšëngaftanga chašmotsamama; y cha Jesucrísoftaca chaboma bëngaftaca ntšamo cha tšabá tbojtsinÿancá. ¡Nÿetscanga nÿetsca tescama Cristo chamotsatschuaná! Chca chaotsemna.

²² Jesucrístbeyeca catšátanga, tšëngaftanga cbontsaimpadana, jábuayenama ntšamo tcbonjauyancá, puerte uantádoca tšabá chašmóyëngacñama, er nÿe básefta palabrëngaca chama tcbonjubaábiamama.

²³ Atše sëntseboše tšëngaftanga chašmotsetátšëmbo, Timoteo Jesucrístbeyeca bëngbe catšata, ya ndoñe utamená yontsemnama, y cha betesco átšbioye chaojtabëse, átšeftaca chanjëftsbetše tšëngaftanga jányama chajá ora.

²⁴ Tšëngaftanga ošbuachiyëngbeñe nÿetsca amëndayënga šmochjácheuaye, y nÿetsca Bëngbe Bëtsabe entšágnaca choca. Chë Italia luaroquënga ošbuáchiyënga tšëngaftanga cmontsacheuaná.

²⁵ Atše, Bëngbe Bëtsá sëntseimpadana, cha chaoma tšabe bendicionënga tšëngaftangbeñe chaotsemnama.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9